



三才圖會
 卷之五
 雜考
 雜考續三

ル 5
 1111
 8



門外 1111
卷 8

三省邊防備覽 藝文下

藝文

鄖竹道中記險

淞江嚴如澄輯
安康張鵬彬梓

黃暉烈

江以南浙以西自京江迄錢塘七百餘里歷五郡十二縣
一葦杭之可臥而至也未有鄖境之廣大險遠者如以江
浙計蓋幾幾跨七郡不止焉鄖之屬邑凡六而竹谿為最
遠因大路陡險問道於徑約而計之自郡城西南行四十
里為大嶺又十五里為小嶺皆曼衍平迤騎可上下又西
二十里為花果園又二十里為營倉又五十里為黃龍灘
則竹江之所經也皆平畦坦途安驅可至過灘而轉西四



十五里爲大峽又二十里爲鮑家店跨澗踰溪不可勝數
幸途不甚險可計程而行自此而上二十里踰河十三里
爲棺木巖其高不過如大小嶺因巖半有洞洞中有石隱
隱若棺故名又四十里越澗數十道爲大埡山山之高下
可二十里於無徑中眇徑僅可容足路出山腰右高左下
一隕越不可問矣遇霖雨冰雪寸步難移過山五里爲唐
家坪則往來宿處也前後六十里皆無煙火行人度不能
至則止而不前又從簡池中行四十里爲界嶺其險與大
埡畧同此鄖縣境也入竹山境卽滾子坡坡雖高而徑坦
至坡麓數百仞乃險仄焉坡下爲水坪河行一十里越澗

二十道至吉陽關高峻頗仄望之又一大埡山矣山行二
十里爲交龍觀以兩山相交故名又二十里爲馬鞍橋西
有峭壁縱橫可五百仞拔地而起倚天而立三面峻絕一
面通山土人避賊時登此以當桃源處也又溪行三十里
爲九里岡自吉陽關下至此凡跨澗九十一道自岡以南
二十里爲寶峯以西十里爲千佛洞路之坦無過此者又
二十里爲縣河舖則緣山上下稍紆折焉過縣河而西始
入竹谿境逾河十里爲磁瓦觀山雖高而其途則坦又二
十里爲水坪山皆有人跡非復大埡諸山之險惡矣水坪
至縣止三十里登山觀之如在履焉自郡至縣凡五百餘

三省邊防便覽
里急行七日可到緩行或至經旬也大約山行則盤空屈
曲水行則怪石亂流山行自下而上不敢仰視若懸巖欲
墮者然自上而下不敢俯視以目眩心悸首重足輕也循
山而行不敢左右視以徑路頗仄高不可攀下不可極膽
顫股慄也山溪無常遇暴雨則望江而歎不可以梁且不
勝梁也嚴寒則冰雪載塗溽暑則汗流接踵又有虎口之
血灑灑於叢篁積石間無鳥翼獸蹄而以父母之身試於
不測較之宦遊江浙者奚啻天淵哉爲之計者無五丁之
力山不可開矣惟有誅藤伐棘剪蔓除蒿徑之缺者補之
斷者續之枯木朽枝頑石之橫梗於道者除而去之則其

功亦可以世世顧數十里無居人而行人則惟日不足也
誰爲此不急之舉耶亦第存之以見谿令跋涉之難云爾
興安陞府疏

畢沅

奏爲陝省興漢二屬暨終南山一帶地方險要請改設官屬
以資控制以重稽防事竊照陝西興安直隸州濱臨漢水
背負終南爲秦蜀之關鍵亦荆襄之門戶萬山重疊實係
四塞奧區形勢最爲險要該州管轄平利洵陽白河紫陽
石泉漢陰六縣通計地方四千餘里從前俱係荒山僻壤
土著無多自乾隆三十七八年以後因川楚間有歉收處
所窮民就食前來旋即棲谷依巖開墾度日而河南江西

安徽等處貧民亦多攜帶家室來此認地開荒絡繹不絕是以近年戶口驟增至數十餘萬五方雜處良莠錯居邇來風俗刁悍訟獄繁興命盜案件甲於通省兼有外來無業匪徒因地方僻遠易於匿跡潛踪出沒無定兼之該州向有總兵同城駐劄近復添設重兵號為鉅鎮兵民交錯庶務殷繁舊設知州一員臣細察情形並與司道等詳加商酌該州品秩稍卑辦理恐形掣肘必須將興安州陞為興安府改設知府方足以資彈壓至現有之州吏目即改為府照磨兼管司獄事務原設州學正改為府教授訓導改為府訓導又府城內應設知縣一員即將州屬之漢陰

縣改為附府首縣查興安係古安康郡地應請即名為安康縣將州轄地方歸併管理其原設漢陰縣典史移為安康縣典史原設漢陰訓導改為安康教諭至漢陰舊治在興安迤西一百八十里未便乏員應另設興安府通判一員駐劄此地專司捕盜緝匪及查拏地方私販鹽茶私宰私燒賭博撻降等事再興安境內西南磚坪地方距州二百四十里楚蜀人民雜處實為要隘此地將來歸併安康首縣管轄應另設分防縣丞一員又興安所屬紫陽縣西南之二州埡距縣一百八十里與川省太平縣連界平利縣東南之鎮坪距縣四百八十里與川省太平大寧等縣

及楚省竹谿縣連界壤境犬牙相錯箐密林深兩地均屬緊要應於二州埡添設主簿一員卽將西安府知事裁改移駐鎮坪添設巡檢一員同磚坪所設縣丞俱令專司緝捕再查漢中府屬之西鄉縣南之大池壩距縣三百里與川省通江縣連界又褒城縣南之黃官嶺距縣一百三十里與川省南江縣連界該處俱山路荒僻最易藏奸應請於大池壩添駐分防縣丞一員黃官嶺添駐巡檢一員俱令就近盤緝奸匪其黃官嶺之巡檢卽將該縣之青橋驛驛丞裁汰改移此與安漢中應行改設官屬以資鎮壓防範之情形也至省城遞南之終南一山綿亘西安鳳興各

府州屬周圍約計數千餘里崇山峻嶺俱係鳥道羊腸路徑阻險先時不過土著居民樵採爲活近年四川湖廣等省之人陸續前來開墾荒田久而益衆處處俱成村落而遠方遊手無籍之輩亦借以雜插其間卽如去年川楚咽喉每有竄入漢興沿山境地擾害村氓雖經堵截嚴拏不敢再至但溪山重繞煙戶零星距各該本營州縣本城近則三四百里遠至七八百里不等地方官見聞阻隔難以防範稽查萬一滋生事端未免往返需時鞭長莫及甚爲可慮臣再四籌酌必須於山中要害處所添設丞倅等官分管山內地方就近治理專司防緝事宜方爲妥協查山

以東自咸寧縣之太乙峪由藥王堂舊縣關南至興安北境約計七百里而舊縣迤西地名孝義川爲扼要之地應添駐西安府分防同知一員至山以西自長安縣子午谷由江口西南至五郎關直抵漢中府北境約計七百餘里其五郎關爲扼要之地應將西安水利通判改爲西安府分防通判移駐五郎關并照從前漢中府屬鳳縣地方分隸留壩廳之例將山以內向隸咸寧之地方煙戶俱歸移駐之通判管理所有各分管境內凡人命盜竊及一切案件俱令該同知通判審解民賦錢糧亦皆歸劃征解并請於同知通判各駐劄之地添設巡檢兼管司獄事務各一

員如此則東西南南路聲勢聯絡一切防奸緝匪稽察易周實爲一勞永逸之舉此終南山以內應行添設官員以資鈐轄捕緝之情形也以上改設之知府同知通判縣丞主簿巡檢等官內查興安州本係繁疲難三項要缺今應仍爲在外揀選陞調之缺其新首邑之安康縣亦定爲疲繁難三項要缺與添設同知通判以下各員均定爲要缺在外揀選陞調以資治理惟查定例地方職官止許改調不許增添但今陝右各屬惟西安水利通判青橋驛丞及西安府知事等員可以移駐裁改此外尙缺同知通判各一員縣丞二員巡檢一員巡檢兼管司獄事二員緣陝右

各屬幅幘最爲遼濶向來丞倅佐雜等官額設無多嗣復節次裁汰移駐新疆是以現在均係緊要地方再無冗員可供裁汰臣仰荷

聖恩簡任巡撫先後十年於地方一切因革事宜隨時悉心體察此事明知有費更張但今昔情形迥然大異而山川扼要形勢阻深不得不爲未雨綢繆之計斷不敢因循拘泥惜有限之費以致異日貽悞地方臣復與督臣李臣往返札商意見俱屬相同謹合詞恭摺具奏并繪興漢及南山一帶地圖將各州縣境內要隘處所應行添官駐劄各地方詳細貼說恭呈

御覽伏祈

皇上

睿鑒施行如蒙

俞允所有一應改設移駐官員各事宜容臣與藩司尙安等另行詳悉定議

題達辦理合併陳明謹

奏

乾隆四十七年正月

日奉

旨該部議奏當經部議請

旨交該督撫會核酌議具

奏奉

旨依議當經督撫會核酌議覆

奏五月 日奉

旨該部議奏當經吏部等部議准覆

奏九月 日奉

旨依議欽此

部議經畧會奏陝省邊界地方緊要會籌添改文員以資
撫治事宜

議得經畧大臣西安將軍額勒登保等奏稱竊照陝省各
路營制既經酌定其文員所管地方如有幅員遼濶撫治

難周必須量為變通查漢中府屬西鄉地方袤延千有餘
里地廣人稠山深箐密其西南自樓坊坪起至鹽瀝關一
帶在在與川省太平通江巴州毗連犬牙相錯奸究易藏
最為漢南難治之地向設知縣一員典史一員並分防鹽
廠關大巴山巡檢二員大池壩縣丞一員在尋常無事之
時地方官遇有相驗踏勘等事一經公出動須十日半月
已屬經理難周迨至連年賊匪滋擾又在該縣往來最久
蹂躪殆遍地方受害最深閭閻日形凋敝當此大功告成
之際尤須加意整飭撫綏舊有各員更屬不敷治理奴才
等公同酌籌應於漁渡路營地方添設撫民捕盜同知一

員司缺一員其地距西鄉縣城二百九十餘里係通川省大路一經添設專員所有隣川邊界俱可就近稽查而於知縣分疆治理於安民緝盜均不致有鞭長莫及之虞又西路之簡池壩地方距漁渡路營二百二十里與川省通江鐵溪河兩河口接壤地方甚為緊要必須添設專員經理應請卽於該處添設巡檢一員以資稽察又原設鹽廠關巡檢一員距漁渡路營二百里其地本非扼要且衙署已被賊焚燒必須另爲移駐查有姚家壩地方距漁渡路營一百二十餘里與川省通江板橋子竹峪關巴州鑄團圍連界地甚扼要應請將鹽廠關巡檢移駐彼處卽可與

簡池壩巡檢爲東西犄角之勢於巡緝較爲有裨至漁渡路旣添設同知足資控馭其附近之大池壩縣丞卽可移駐五里壩該處距西鄉縣一百五十里距紫陽石泉縣境毗連可以分理東路巡緝等事所有簡池壩姚家壩巡檢俱在迤南通川之地應卽歸於漁渡路同知管轄其五里壩縣丞大巴山巡檢仍歸西鄉縣管轄以期各專責成又興安府屬紫陽縣西南二百二十里路通川境之二州壩地方於乾隆四十六年奏明添設分防主簿一員專司緝盜等事所有附近之蔴柳塘毛壩關新灘塘大壩塘權河塘等五處俱歸該主簿管轄近年以來因賊匪滋擾已將

衙署焚燬舊有居民亦俱遷徙自應另爲移駐查毛壩關地方亦在縣治西南距縣城一百八十餘里該處煙戶稠密貿易紛紜與四川太平縣境處處可通地方實係緊要應請將二州壩主簿卽移駐毛壩關以昭嚴密又興安府屬之平利縣治距府城九十里南北二面俱係崇山形如釜底登山瞭望城中虛實一目了然且守兵僅止數十名煙戶又復稀少連年賊匪逼近屢次瀕危亟應另爲移駐查相距縣城九十里之白土關地方亦爲川楚通衢要路商賈往來絡繹居民數倍於縣城該處原設都司現經才等另摺奏請改駐遊擊並已捐修城堡雉堞崇墉規模

去厥應請縣治移駐該處以資撫治又新設寧陝營汛應酌添佐雜等員查洋縣華陽地方已設有參將營制維該處距縣城一百數十里山徑分歧向多川楚客民開荒耕種良莠不齊縣治相隔較遠未能隨時緜緝應卽添設縣丞一員分防巡察又寧陝鎮標應分設四畝地都司營汛該處距廳城較遠稽察難周亦應請添設巡檢一員以資巡緝奴才等因地因時逐加體察不得不會籌變通以期於地方有裨所有應行添建衙署並分管煙戶各事宜容另行核定分晰題達等因前來查定例各省應需人員管理准其於通省內隨時改調不得具奏增添致滋糜費又

三省邊防備覽
各省道府以下各缺該督撫不得妄行更改若因地方今昔情形不同不得不為變通者准該督撫隨時具奏等語查經畧大臣西安將軍額勒登保等奏稱陝省各路營制既經酌定其文員所轄地方如有幅員遼濶撫治難周必須量為變通查漢中府屬西鄉縣地方袤延千有餘里地廣人稠山深箐密其西南自樓坊坪起至鹽廠關一帶在在與川省太平通江巴州毗連犬牙相錯奸宄易藏最為漢南難治之地於尋常無事之時已屬經理難周迨至連年賊匪滋擾地方受害最深大功告成之際尤須加意整飭撫綏舊有各員更屬不敷治理應於漁渡路地方添設

撫民捕盜同知一員司獄一員簡池壩地方添設巡檢一員原設鹽廠關巡檢一員應請移駐姚家壩地方其大池壩縣丞即可移駐五里壩所有簡池壩姚家壩巡檢即歸漁渡路同知管轄五里壩縣丞及大巴山巡檢仍歸西鄉管轄又興安府屬紫陽縣二州壩主簿一員應請移駐毛壩關又平利縣治移駐白土關地方又新設寧陝營汛應酌添佐雜等官查洋縣華陽地方應添設縣丞一員又寧陝鎮標分設四畝地應添設巡檢一員以資巡緝等語查各省地方有今昔情形不同應添設額缺者例應於舊設額缺內裁抵今陝省請添設同知一員縣丞一員司獄一

員巡檢二員並未將舊設額缺裁改與定例不符維陝省
近年以來辦理軍務現據該大臣等聲稱當此大功告成
之際尤須加意整飭撫綏尋常添設者不同應如所請
漁渡路地方准其添設撫民捕盜同知一員司獄一員簡
池壩地方准其添設巡檢一員原設鹽廠關巡檢一員准
其移駐姚家壩地方大池壩縣丞一員准其移駐五里壩
地方二州坵主簿准其移駐毛壩關地方平利縣治准其
移駐白土關地方洋縣華陽地方准其添設縣丞一員寧
陝鎮標四畝地准其添設巡檢一員俟

命下之日臣部行文該大臣等此次添設員缺較多該省原設丞

俸佐雜額缺內是否實在無可裁調仍令該大臣等確切
聲明其添設同知佐雜各官俸薪添建衙署應鑄印信及
各缺應如何酌定繁簡漁渡路同知各缺定爲何名目之
處並一切未盡事宜統俟該大臣等分別題咨各該部核
辦等因嘉慶七年七月十三日奉

旨依議欽此

奏請改漢中鹽課歸地丁摺

方維甸

爲酌籌漢中鹽務事宜仰祈

聖訓事竊陝西鹽務尙在試辦期內本年二月臣與山西巡撫成

格會

奏將鳳翔府屬仍照舊制准食花馬大池鹽攤納鹽課銀毋庸設立土商業經戶部議准民情稱便茲據布政使慶保鹽法道明信轉據漢中府稟稱漢中各屬留壩定遠本無鹽課南鄭等九州縣額引二萬五千道每年應交鹽課三千七百五十兩設有土商抽鹽辦課而各州縣內洋縣西鄉兩縣鹽法於康熙年間議定由各里攤納課銀並不抽鹽此漢中向來辦理章程也今復設立土商抽鹽辦課漢中本無殷實大商認充者率皆市儈抽鹽抽錢未免貪得無厭卽或公平抽收而肩挑背負之人獲利有限不肯分給他人是以每遇抽課鬪毆口角爭競紛然隨時懲辦不

能盡絕請照鳳翔之例裁去土商於洋縣西鄉一律攤納課銀庶免滋擾等語臣檢齊歷年案卷詳加查核雍正十一年十月甘肅巡撫題請漢中改食花馬大池鹽斤戶部議令將如何可以實銷照例截實之處妥議

題復於乾隆元年會同陝甘總督劉於義河東鹽政孫嘉淦具

題以漢中寫遠不得不賴小販以濟民食實運勢所難行亦當俯從民便若於課項有虧民食有悞自當責以實運實銷今旣兩無違碍仍照舊空截引角毋庸另議更張經部題覆奉

旨准行又漢中府屬之洋縣於康熙三十三年該縣士庶公議按里攤納詳定章程西鄉縣亦即仿照辦理各在案蓋緣漢中地處萬山之中僅通負販該處食鹽有自花馬大池山鳳翔山內運來者有自川甘邊界運來者所設土商向不持引運鹽皆俟小販到境抽錢抽鹽謂之抽鹽辦課俟課項交足即將官引截角繳銷謂之空截引角從前因土商苛勒小販乾隆二年布政帥念祖等即有詳請裁商照鳳翔洋縣攤納課銀之議今既復設土商則措勒多收之課在所不免且小販到境不復抽鹽已閱十餘年之久一旦爲土商坐分其利人情總不貼服此等無業貧民亦有軍

營散出之人性復桀驁若竟絕其生計商販相激恐致釀成事端此實地方隱憂尙不僅販運不前民食貴鹽而已臣訪詢情形漢中文武軍民所言大抵相同並接據提督楊遇春來信亦稱弁兵巡查地方常見有商販滋鬧處不能相安事關緊要似應亟圖良法等因臣再四籌思與藩司慶保鹽法道明信虛衷商酌漢中鹽法自

國初至今皆係小商並非商運商銷釐設土商徒使累民滋事似應依仿帥念祖原議將漢中一府鹽課照洋縣西鄉章程一律攤納並請照鳳翔之例裁去土商永杜壟斷之弊如此辦理尙係遵循舊章並非輕更成法鹽價益賤民情

益安每年交官課銀仍可絲毫無缺實與官民均屬有益
且漢中鹽價貴於興安向不販過西鄉地界於興安行銷
河東鹽斤亦無妨碍至於空截引角原非核實辦法漢中
引數又不在河東額引之內今既裁商亦可停發引張以
歸簡易所有酌籌漢中鹽課緣由謹繕摺

奏請

聖裁伏乞

皇上睿鑒訓示謹

奏

再請漢中鹽課歸地丁摺

方維甸

為籌議漢中鹽務摺覆

奏事竊臣前奏漢中鹽斤攤納課銀一摺接准戶部議覆內
開漢中府民食鹽斤攤納課銀固屬因地制宜之道但現
在漢中鹽價貴於興安自不至有越販之弊倘將來產旺
價賤或不免偷入隣境有碍官引且引張原為行鹽征課
稽查私販而設是有鹽即應有引今裁去土商不用鹽引
憑何稽查又加按里攤納必須專司催收之人亦難保無
派累閭閻之事應如何定以限制稽查妥善之處令該撫
悉心議奏等因當行司道轉飭漢中府妥議去後茲據藩
司慶保鹽法道明信會詳前來臣復面加商酌查行鹽定

例原應持引運鹽不准鹽引相離以便稽查但漢中鹽務與他處不同土商向不持引運鹽祇係抽收小販鹽斤交課後即將官引截角繳銷前經陝甘總督劉於義甘肅巡撫許容河東鹽政孫嘉淦於乾隆元年疏稱實運勢所難行仍請空截引角

題明覆准在案是漢中鹽引從不用以行鹽有案可稽即使虛設引張亦屬無從稽察今既裁去土商應請停發引張以歸簡易再漢中鹽價貴於興安之故並非由於產鹽多少皆因販鹽道遠成本較重其價不得不昂若自漢中陸運興安大山重疊運本愈增販往無可圖利若由漢江水

運必從黃金峽經過此峽內灘流湍急漩渦甚險重船向不敢行毋虞偷越隣境有碍興安官引至於按里攤納與正項錢糧無異陝西完納正賦皆係里長等催交此項鹽課亦一併責成里長鄉約毋庸另派催收之人鳳翔府及洋縣等處皆係如此辦理現擬於開征之前將各縣攤納細數刊入易知由單並由司出示曉諭務使各里週知吏胥無從影射自不至有派累閭閻情弊臣因漢中鹽務商販不能相安恐滋事端是以查照向來例案奏請裁商攤課茲准部咨復行體察情形悉心妥議可否照臣前奏辦理之處伏乞

聖上睿鑒

勅部議覆施行謹

奏

川陝楚老林情形亟宜區處

卓秉恬

爲敬陳川陝楚老林情形亟宜區處仰祈

聖鑒事竊惟普天同化雖犬牙相錯之地原無畛域之分而無業貧民當烏合成羣之時每多嘯聚之患此川陝楚之老林不可不早爲區畫而棚民不可不妥爲撫綏者也蓋由陝西之畧陽鳳縣迤邐而東經寶鷄郿縣盩厔洋縣寧陝孝義鎮安山陽洵陽至湖北之鄖西中間高山深谷千枝

萬派統謂之南山老林由陝西之寧羌褒城迤邐而東經四川之南江通江巴州太平大寧開縣奉節巫山陝西之紫陽安康平利至湖北之竹山竹谿房縣興山保康中間高山深谷千巒萬壑統謂之巴山老林老林之中其地遼濶其所產鐵礦竹箭木耳石菌其所宜包穀蕎麥燕麥而山川險阻地土磽瘠故徭糧極微客民給地主錢數千卽可租種數溝數嶺江廣黔楚川陝之無業者僑寓其中以數百萬計依親傍友墾荒種地架數椽棲身歲薄不收則徙去斯謂之棚民其種地之外多資木廂鹽井鐵廠紙廠煤廠傭工爲生此皆仰賴

聖天子育養黎庶而地不愛寶者也顧人聚既多則良莠莫辨不安本分者時有攘竊之行必年穀豐登糧價平賤各處傭工庶幾尙有生計倘遇旱澇之時糧價昂貴則傭作無資一二奸民倡之以喫大戶爲名而蟻附蜂起無所畏忌山內州縣大者週圍一二千里小亦常五六百里地方遼濶耳目難周遇事必數日聞報數日始至其處非糾結爲匪難以輕動卽剽竊遠颺莫可追捕故居恒互相隱諱浸假而成大案迨以踈防參劾事已無濟且省各有界賊或踰境而免官難越境而謀各處距會城遠者二三千里近者千數百里不請命則專請命則緩不及事况事連三

省大吏咨商往返州縣奉飭恒在數月後臣愚謂老林區畫之策不能卽一隅而專謀之必當合三省而共議之似須於扼要之地專設大員控制如現在福建之臺灣廣東之雷瓊皆專設守道又如湖南之鳳凰永綏等廳則以辰沅永靖道駐紮其地專理苗疆雖棚民之性情與苗疆不同而老林之險隘實要害所在查現在有苗地方旣以土司土目撫綏於下又以府廳州縣統治於上而又設道員大吏鎮壓之至棚民於各縣山險之地或聚或散或徙或居若鳥獸之無羈縛者雖陝西之陝安道四川之川東道湖北之安襄鄖荆道未嘗不分轄其地而任分則事難專

一界分則官得推諉查鄖陽地方明季曾設撫治大員嗣經裁撤想彼時人煙稀少因時制宜而然今我

國家休養生息垂二百年生齒日以繁荒蕪日以闢故凡有山廠可以營生之處勢難禁其聚集若不妥爲措置必致日久生事此旣辦綏靖地方之策宜思字養生民之道况即鄖陽一府而論幅幘之廣幾與安徽一省埒今僅設六縣以治之惟恐有鞭長莫及之慮鄖陽如此而川陝有老林處之州縣亦可概見伏祈

敕下三省督撫確勘情形詳核時勢應如何變通之處會同區畫妥善辦理庶老林皆樂土而棚民悉安業矣爲此奏

聞伏乞

皇上聖鑒

籌辦川陝楚老林情形會商確勘緣由
爲遵

旨籌辦川陝楚老林情形謹將會商確勘緣由先行恭摺奏

聞仰祈

聖鑒事竊臣等承准軍機大臣字寄欽奉

上諭卓秉恬奏川陝楚老林地連三省無業之民僑寓其中易致滋事宜如何彈壓撫綏之處著蔣攸銛朱勳毓慶確勘情形悉心籌畫會同定議具奏欽此臣蔣攸銛於正月二

三省邊防備覽

卷十七

藝文下

十九

十八日行抵西安與臣朱勲悉心會商查四川之保寧綏定夔州三府界連陝西之漢中興安兩府所屬地方跬步皆山向多外來客民墾種山地五方雜處良莠不齊近年以來老林日漸開墾煙戶倍增其開墾成熟之客民均已編入保甲甫經開墾之老林客民零星散處不能編成保甲之戶卽責成地主約束稽查惟該州縣所轄地方自數百里至千餘里不等路險山深實有耳目難周之勢臣等悉心籌畫自應於兩省交界州縣相距較遠之處添設文員以資治理庶查察易周而聲勢可期聯絡其邊界地方必須查勘明確方可會商定議查興安府爲三省邊界適

中之地臣朱勲於接奉

諭旨後查新任陝安道嚴如煜歷練老成於南山情形最爲熟悉已札飭該道前往邊界查勘臣蔣攸銛回任後卽派委員隨同該道將川省邊境逐處確查並飭該道於查勘事畢卽在興安暫住臣等已知會湖北撫臣毓慶飭知委勘情形之鄖陽府知府倪汝煒竹山縣知縣范繼昌前赴興安會繪全圖酌擬章程臣等再行會同臣毓慶斟酌定議具

奏謹將會商緣由先行恭摺奏

聞伏乞

皇上聖鑒

查勘川陝楚老林情形會同酌議添改廳治營汛以資彈壓撫綏

為遵

旨查勘川陝楚老林情形會同酌議添改廳治營汛以資彈壓

撫綏仰祈

聖鑒事竊臣等前奉

上諭卓秉恬奏川陝楚老林地連三省無業之民僑寓其中易致滋事宜如何彈壓撫綏之處著蔣攸銛朱勳毓慶確勘情形悉心籌畫會同具奏欽此臣蔣攸銛

陛見回任行抵西安與臣朱勳悉心會商以陝安道嚴如煜歷

練老成於南山情形最為熟悉飭委該道前往邊界查勘

一面知會臣毓慶飭令楚省委員鄖陽府知府倪汝燁竹

山縣知縣范繼昌並川省委員保寧府知府徐雙桂忠州

知州李紹祖等各將邊境逐處確勘於查勘事竣齊赴適

中之興安府地方會繪全圖酌議章程臣等再行會商斟酌

酌定議當經先行恭摺奏

聞在案旋據陝安道嚴如煜督同各委員將查勘情形繪圖貼

說酌議章程具稟核辦臣等各批令藩臬兩司詳細核議

茲據該司等具詳前來臣等伏查陝西之漢中興安二府

三省邊防備覽
界連四川之保寧綏定夔州三府其湖北之鄖陽府則與
陝西之興安商州四川之大寧巫山接壤該府等所屬地
方均在萬山之中幅嶺遼濶綿亘數千餘里節年以來老
林開墾日廣外來客民戶口日增五方雜處訟獄繁多且
風俗剽悍山深路險最易藏奸全在地方官撫治得宜始
足以彈壓撫綏茲據陝安道等勘明川陝楚三省連界之
太平平利安康竹谿等縣均相距在千里以外其間層巒
疊嶂實爲稽察難周自應於交界州縣相距寫遠扼要之
處添設文員以資治理庶查察易周聲勢可期聯絡其川
省邊境營汛亦須酌量改移俾足以專巡防而臻嚴密

等悉心籌酌因地制宜各就通省情形量爲改移裁抵謹
將所議各條另繕清單恭呈

御覽如蒙

俞允應須移建衙署應鑄印信及分疆撥界一切未盡事宜容

俟照例分別

題咨辦理所有臣等會議緣由謹會同陝甘督臣長齡兩湖

督臣陳恭摺具

奏並將三省交界地方繪具輿圖恭呈

御覽伏祈

皇上聖鑒

陝西邊境應改設文員以資治理也查陝西興安府屬之
安康縣所管地方跬步皆山幅幘遼濶地方官查察難周
該縣迤南之磚坪營與四川太平廳城口營連界中間大
界嶺楊四巖南天門兩扇門等處未開老林袤長三四百
里地極險要原設磚坪縣丞一員不足以資治理應改設
撫民通判一員並設巡檢一員兼管司獄事務其地距安
康縣二百四十里係通川省要路添設廳治自磚坪以南
直至隣川邊界俱歸通判管理俾資彈壓與知縣分疆治
理庶不致有鞭長莫及之虞查有鳳翔府通判與該府同
城事務甚簡可以裁抵改爲磚坪撫民通判該處界連川

省地方繁要應請照孝義寧陝雷壩定遠等廳邊俸之例
定爲在外題調要缺五年俸滿保題陝省繁缺現在無可
改簡並請免其裁繁改抵其應需巡檢一員查雷壩廳南
星巡檢係屬閒曹應卽以該巡檢裁汰改爲磚坪巡檢兼
管司獄事務其舊設磚坪縣丞一員查漢中府屬之黑河
棧壩一帶綿亘數百里山大林深地甚險要應將磚坪縣
丞移駐黑河適中之畧陽觀音寺改爲畧陽縣丞專司巡
緝以昭嚴密又西安府屬之藍屋縣所管山內地方西南
至洋縣六百里山深路險且木廂最多匠作傭工之人不
下數萬偶值歲歉停工易滋事端縣治相距寫遠實屬稽

察難周查蓋洋交界之教場壩地方適中扼要應於該處添設縣丞一員以資撫治查有同州府屬之華陰縣縣丞事務甚簡應卽裁抵改爲蓋洋縣丞歸於西安府考劾又陝安道漢中府二缺本係選缺嘉慶五年因該道府員缺緊要

奏准改爲衝繁疲難在外題調之缺嗣經部議以選缺道府例不准改爲題調將該道府改爲請

旨簡放查陝安道統轄漢中興安二府地處南山界連川楚近年老林開墾日廣外來客民戶口日增五方雜處訟獄繁多民刁俗悍今昔情形迥不相同道府有控制撫綏之責

必須熟悉地方情形之員隨時整飭稽查緝匪安良庶足以收實效應請將陝安道漢中府二缺均仍改爲在外題調於南山地方實有裨益

一川省邊境應改設文武員弁以期撫綏彈壓咸臻周密也查川省之太平廳同知所管地方周圍三千餘里幅員本屬遼濶該廳從前原係縣治於嘉慶六年改縣爲廳將城口主簿改爲經歷並設都司營分同駐城口今察看情形城口營距廳城三百八十里界連陝省地方緊要原設經歷一員不足以資撫治應請將太平廳同知並訓導照磨各一員移駐城口卽將城口經歷所管地方劃歸管理作

爲城口廳同知照陝西孝義定遠等廳邊俸之例定爲題
缺五年俸滿保題卽陞其設城口經歷移駐高觀寺場分
防彈壓仍定爲繁缺歸城口同知管轄至太平廳旣已移
駐城口則太平廳原管地方應仍復爲太平縣設立知縣
典史訓導各一員以資經理查知縣典史川省無可裁汰
應請添設其訓導一缺查有叙州府屬之筠連縣訓導堪
以裁抵移駐並查巴州所管之鍋團園秋波梁等處通江
縣屬之竹峪關黃忠堡等處均與太平縣相近應改隸太
平縣管轄將該縣亦定爲題缺五年俸滿保題卽陞所有
城口同知太平縣知縣均歸綏定府屬管轄又南江縣界

連陝省南鄭褒城道路綿長中隔老林稽查非易應改爲
題缺五年保題俾得擇人而治以收實效至太平廳同知
高觀寺經歷本係繁缺均無庸裁繁抵簡惟南江縣並添
設之太平縣二缺旣定爲繁缺在外題陞例應裁繁改抵
但川省繁缺本少無可酌改應請免其裁抵再巫山營屬
之大昌汛地方係通湖北房縣竹谿要路本係守備營分
因添設營制案內改爲千總駐劄應請復設守備歸夔州
協管轄以大壩營推缺守備裁抵改爲在外題補以資控
馭又通江縣屬之竹峪關旣改歸太平縣管轄應由太平
營派撥千總一員兵六十名前往分防其通江營原派駐

防竹峪關汛弁兵應撤回通江營以昭畫一

一湖北邊境應改設文員以資治理也查楚省鄖陽府屬之房縣竹山竹谿三縣與四川之大寧巫山陝西之平利連界相距各縣治均在五六百里以外中間高山深谷客民雜處最易藏奸縣治相距遠地方官實屬稽察難周今察看情形竹山之白河口為適中扼要之地必須於該處添設撫民同知一員並設學官照磨各一員以資治理查有德安府通判與該府同城政務甚簡應請將該通判裁汰改為白河口撫民同知定為題缺五年俸滿保題即將德安府司獄改為白河口撫民同知照磨兼管司獄事務

其應需學官一員查保康縣向設教諭訓導二員應將該訓導裁撤改為白河口同知訓導以資訓迪又竹谿縣之豐溪地方房縣之博磨坪地方均係邊境扼要之區應於該二處各設巡檢一員專司巡緝以昭嚴密查有宜昌府司獄可以改為豐溪巡檢房縣之板橋巡檢可以移駐博磨坪改為博磨坪巡檢並將房縣九道梁巡檢統歸新設之白河口同知管轄所有德安宜昌二府司獄既經裁移改為巡檢其該府司獄事務應歸該府經歷管轄又竹山竹谿二縣均係題缺惟該二縣界連川陝最為難治應請將該二縣均改為邊缺五年俸滿保題又安襄鄖荆道係

請
員之缺鄖陽府係部選之缺查安襄鄖荆道統轄三府一州界連川陝豫三省幅幘甚爲遼濶且鄖陽邊界老林前已添設營汛今又議設廳治稽查官吏撫輯兵民必須熟悉風土人情之員方足以資彈壓撫綏鄖陽府所轄六縣地俱寬廣訟獄繁多亦須精明幹練熟諳民情之員以資彈壓得力應請將安襄鄖荆道鄖陽府知府二缺均改爲在外題調之缺俾得擇人而治以收實效至鄖陽府旣改爲繁缺在外題調例應裁繁改抵但湖北省知府內並無題調缺分無可酌改應請添設無庸裁抵

添設廣元巴州綿州三營摺

蔣攸銘

爲管制今昔異宜籌議添設裁撥以重防守而資控制恭摺奏請

聖鑒事竊照川省自平定金川以後歷次籌議營制分別撥改增添邊防已稱周密惟川北沿邊一帶地方遼濶民俗囂浮情形尤關緊要其間如廣元一縣爲入川首站界連陝甘兩省從前原係將川北鎮標右營守備移駐其地嗣於平定金川案內裁歸新疆計自成都至該縣通衢千里之遙沿途雖設有汛防並無都守營分而該管之川北鎮標營相距較遠或數百里或百餘里不等其駐紮廣元縣屬

黃楊堡之守備一員距縣城亦有一百五十里衝途要地無一大員駐紮營分原不足以昭慎重卽巴州一處在川北鎮駐紮之東北地則袤亘數千里界則毗連陝境山深箐密最易藏奸向係通巴營派撥弁兵在彼防守地廣兵單亦不足以資彈壓據川北鎮總兵桂涵稟請於各該處添安營制前來臣等查安營設官撥汛抽兵之事必須斟酌盡善彼此咸宜不致畸輕畸重其兵丁之餉乾米折各官之養廉公費亦須通盤籌畫於經費無短絀之虞方可行之久遠而無弊當行藩臬兩司查議復又會同悉心商酌查廣元爲入川門戶自廣元至省綿州爲適中之地應

請於廣元縣城內添安遊擊營分設遊擊一員守備一員千總二員把總四員外委五員額外二員安兵六百名並於綿州城內添設都司營分設都司一員千總一員把總三員外委四員額外二員安兵三百八十名以聯聲勢其巴州一處亦應請添設遊擊營分設遊擊一員守備一員千總二員把總二員外委二員額外二員安兵四百五十名並將駐紮通江縣屬之通巴營守備一營改爲通江營亦歸巴州營遊擊兼轄則界連陝省之通巴南江一帶彈壓巡防更可期其得力惟新添各營所管地方原有各標營撥出弁兵在彼分防如概歸新設營分管轄則各本標

營兵力較單恐不敷差操之用若全行撤回各本標營則
汎地已經分出存營兵數又覺稍多自應酌量情形分別
撤留其新營不敷兵數並添設將弁在於通省各營內核
計擇其今昔不同地方不甚緊要之處抽移添設以免多
糜經費查省城軍標二營督標三營提標則中左右前四
營應請將提標前營一營裁去將原設都司一員守備一
員千總二員把總四員外委六員並抽兵一百六十四名
分撥新營餘兵添入中左右三營管領又懋功協屬五營
向定兵額本較他營過多該處番情久已寧貼無須重兵
駐防其協屬之崇化一營係遊擊營分汎防甚少界連之

各土司亦均極安靜只須改設都司營分足資彈壓應請
將崇化營遊擊一員守備一員撤出並於協屬內酌抽千
總二員把總三員外委四員額外四員兵六百一名一並
分撥新營所有新安綿州營都司一員卽以裁撤之提標
前營都司移駐均作爲推缺歸於提標管轄將城守營派
防之德陽綿竹安縣三汎把總二員外委一員兵九十五
名撥歸該營管轄其潼綿營原派分防之綿州羅江魏城
三汎並川北鎮標原派分防之梓潼汎各弁兵一並撤回
各原營協防將各該汎地卽歸綿州營管轄由該營另派
弁兵防守又新設巴州營遊擊守備各一員卽以崇化營

遊擊守備移駐均作爲題缺歸於川北鎮統轄所有川北
鎮原派分防之南江儀隴兩汛弁兵撤回各本營將汛地
歸於巴州營管轄由該營另派弁兵分防其原駐巴州汛
弁兵亦撤回通江本營改撥通江縣屬之竹峪關汛將竹
峪關原有弁兵撤回綏定太平各本協營差操至崇化營
應行改設都司查有提標永安營屬之大壩營都司所管
汛地甚少地方亦極安靜應請將大壩營都司一員移駐
改爲崇化營都司仍作爲新疆調缺其大壩營即以提標
前營守備移駐改爲大壩營守備仍作爲推缺又廣元地
方旣已改設遊擊營分其縣屬向設之黃楊堡守備一員

即可裁撤將原設守備一員千總一員把總一員外委二
員額外二員兵二百三十七名均歸廣元營管轄所有守
備一員卽移駐廣元作爲該營中軍守備惟應設遊擊一
員通省無可裁抵應請增添與中軍守備均作爲題缺仍
歸川北鎮統轄其川北鎮標原派分防之廣元昭化兩縣
各汛兵二百五十名卽歸廣元營管轄所有原駐該兩縣
千把等官並分防劍州地方弁兵俱撤回川北各本營差
操由廣元營另派弁兵防守又潼綿營都司係駐紫潼川
府城管轄潼川府綿州兩屬汛地今綿州旣設專營則潼
綿營應改爲潼川營原派分防綿州屬弁兵均卽撤回其

川北鎮標原派分防樂至安岳遂寧三汛弁兵亦撤回鎮標差操將各該汛地歸潼川營管轄由該營另派弁兵分防仍隸川北鎮統轄所有該營原有兵額操防足敷應用惟汛弁不敷分防應撥添把總一員以上應設各官兵除酌畱原防弁兵並於提標等營抽撥抵數外計應添遊擊一員兵八十三名多餘外委二員撥歸軍標差遣查新設各營每兵百名應以馬一步二守七安設除酌畱城守川北鎮標及黃楊堡等營兵數不計外所有提標兵額餉乾每百名係以馬一步二守七支給懋功協五營係以馬二步三守六支給應請照原額撤出以馬一步二守七改設

支給並添募不敷兵八十三名外計餘出餉乾銀七兩二錢又米折一項各營多寡不同除存畱黃楊堡五郎寬灘三汛弁兵一百一十二名應得米折仍照原數支給並所撥川北鎮標兵二百五十名亦照原定米折支給不計外其餘各按裁撤兵數米折核算共裁米折銀八千三百三十八兩五錢三分六釐查新設各營所得米折亦應按照各該處情形分別酌議廣元綿州二營照川北鎮標之例每斗給銀九分五釐巴州地處偏隅糧價本貴酌中定議每斗給銀一錢六分四釐共應給銀四千八百三十八兩四錢三分六釐又撥入軍標外委二員應得米折亦以每

斗九分五釐支給應給銀六兩八錢四分總共應給米折銀四千八百四十五兩二錢七分六釐計餘出米折銀三千四百九十三兩二錢六分又通省各營官弁應得俸薪蔬燭紙紅馬乾均係按品支給惟養廉一項因懋功協五營遠在新疆初設之時較別營支額加增今既移駐新設各營應照腹地各營一律議給計餘出養廉銀三百九十兩又公費一項向係按照兵額酌量支給今新設各營係由各標營裁撥前往其所需公費亦應於裁兵各營內均勻攤撥共撥出公費銀一千四百七兩二錢合計撥出公費及餘出養廉米折餉乾共計銀五千二百九十七兩六

錢六分查廣元營兵額稍多又係衝途差繁每年擬給公費銀七百兩綿州營亦屬衝途每年擬給公費銀四百四十兩巴州亦係遊擊營分且地居險要每年擬給公費銀五百五十兩又增添廣元營遊擊一員應給養廉銀四百兩俸薪蔬燭紙紅馬乾等項銀二百九十二兩五錢三分六釐大壩營都司原定養廉銀二百六十兩今移駐崇化營應照懋功協都司之例加給養廉銀八十兩總計應給公費並增設遊擊分例加添都司養廉共銀二千四百六十二兩五錢三分六釐計實餘出銀二千八百三十五兩一錢二分四釐查省標各營除撥出外共存兵六千五百

二十二名又潼川營兵三百二十三名向定米折每斗均係八分五釐以通省各營米折比較惟省標及潼川營最少各兵買食實有不敷應請每斗加銀一分共加銀二千四百六十四兩二錢在於前項餘銀內撥給加增外尚多餘銀三百七十兩九錢二分四釐每年即可歸入節省項下報部至於各營應抽兵數若即於現在存營兵內撥往該兵等各有家室遠道遷移諸多不便應請定以一年之限令各該標營凡遇兵糧缺出即行停補具報扣除令新設營分陸續招募其提標應抽各兵前赴綿州道路尚不遙遠如有願赴新營者聽似此通融辦理庶兵心稱便兵

額亦不致久懸統計裁撤分撥之外提標存兵一千七百七十名查該標中左右三營原只各有兵四百八十五名今以前營裁撤酌留之兵均勻添撥計每營添兵一百七名川北鎮標三營雖將原駐廣元昭化二汛之兵撥歸廣元營管轄但已將劍州等七汛之兵撤回本標差操計存標兵一千一百六十七名較之從前存標兵數計多餘二百七十名更屬有盈無絀其城守及懋功等營雖亦分別撥出弁兵然與通省營分較核尚屬敷餘於差操不致缺誤如此量爲增改於經費不必議加於原設各標營兵力亦不形減少而自廣元以致省會及巴州通江一帶遼瀾

地方均有重兵分駐犄角相維處處聲息相通毗連陝省
邊界足資控制於營制似更爲周密至衙署有應行增添
者有應行變價移造者其兵房如係移駐必須修給若就
近招募土著即可無須修建此外如新設改駐各員須另
給關防鈐記並各汛地弁兵或尚有應須改撥之處以及
一切未盡事宜統俟奉

旨俞允後再行次第分別

題咨辦理除將新安營分應設將弁兵額分別裁抵增添及
裁出官兵養廉餉乾米折公費各就地方情形核計支給
銀數另造清冊咨部查核外謹合詞繕摺具 奏

秦豫兩省道員等官會巡聯界山場文

張學林

本道查得豫省西南伏牛一山蜿蜒數百里峻嶺插雲疊
嶂層巒綿連秦楚其間巨川大壑幽深阻僻多人跡罕經
前明之末爲逋逃淵藪外間竟罔聞知後一橫逸四出遂
至蔓延而不可制我

朝底定以來百年享太平之福固久已山無伏莽然安不忘
危綢繆未雨且邇歲伊陽一案雖疥癬小疾而見微知著
自應先事預防荷蒙憲臺奏請會巡仰見事燭幾先保泰
救寧至意本道忝任分巡綏靖地方尤爲專責敢不愈切
兢兢去冬調任之初一到屬內山川隘口險易遠近情形

三省邊陲偵覽
並各礦洞禁閉處所備細行查今春巡歷所至審察羣山支幹向背形勢更逐處留心諮訪頃奉憲行飛檄轉飭去後猶慮各屬縣有不能領會開呈明晰扼要者又經切札指示照例登答茲據陸續開送前來稽之往牒參以人言亦頗悉其大槩屬內各縣山場止與本道屬內相連不與外屬連界者本道無庸會巡除將各縣應如何會巡各該管府州應如何會巡本道巡歷至彼就便如何查察之處酌定章程另詳呈請核批飭遵又河南府屬內之嵩縣陝州屬內之盧氏汝州屬內之魯山與南陽府屬內之內鄉南召等處接壤甚爲綿邈幽阻本道應與汝南道會巡前

奉文之初卽先關移汝南道轉飭會查未據關覆茲各縣開呈復又指定處所再行關請俟復查畫一再行會詳請奪外至於秦省聯界者則有陝屬之閿鄉盧氏二縣閿與潼關係屬往來孔道其連接山場亦不高深又人民稠密保甲現行無庸置議其西南有禁峪太峪二口可通陝西華陰雒南俱係行走大路並非深邃且設有本省汛防駐守亦無庸巡會惟盧氏之正西距縣一百四十五里與陝西商州之雒南縣交界界內之百盤嶺野馬嶺閿王礪野牛嶺在在皆崎嶇險阻應用巡查交界之嶺脊名雙土地廟曠無人煙難以往宿嶺東十里盧氏地方地名蘭草有

散居民人數家可暫傍居宿本道擬駐足於此嶺西七里
維邑境內有真人溝亦堪秦省道員駐宿先相關訂翌早
登嶺即可面會商酌一切事宜又盧氏之西南一百五十
里與陝西商州之維南縣交界由縣治一百三十五里至
朱陽關爲今移駐州判之處雖屬崎嶇猶爲人所常行之
境由朱陽關至耿家店二十五里多須步行由耿家店至
粟子坪龍泉坪四十里間有步難行者由龍泉坪至牌樓
溝交界五十里則高陡險峻並無居民界西二十里訪聞
地名老莊係陝西商南縣地方險亦相似老莊之西則不
能悉既籌我所能往亦須籌彼所能來今擬本道或住宿

耿家店或住宿粟子坪只可支帳房棲止秦省請令自酌
擬住宿之處遣一介遙相關會此等僻阻之處奸匪最易
潛跡搜捕尤宜曲盡查各處有山居銃手平日以逐獵爲
生習慣自然攀陟猶非所苦擬各募招二三十人捐給飯
食火藥督以少健丁壯令向各山要口遍處搜尋或有藏
伏之奸自無能遁再者兩道每年止能會巡一次或令兩
縣每年亦會巡一次該管兩州每年亦各會巡一次兩縣
武汛員各會巡一次其兼轄統轄官亦各會巡一次則一
年有五六次之會巡其於防緝之道更爲嚴密至會巡之
期夏月草木叢密且恐山水暴發阻絕難以深入冬寒冰

雪亦凍滑難行惟二三四八九十月爲宜緣奉飭議事宜
是否有當仰祈憲臺核酌咨移秦省督撫兩院憲轉飭查議
關訂遵行

會查伏牛山詳文

張學林

伏牛一山起自盧氏之西北一百一十里與陝西雒南縣
毗連由盧氏三百里至嵩縣九十里至伊陽伊陽至魯山
一百八十里魯山至南召九十里南召至南陽九十里至
鐵牛廟而止此由西北而東南斜長八百里也豫之南界
由浙川縣西至陝西南南縣百餘里南至湖廣均州八九
十里南由浙川起北至永寧縣止斜寬約有四百餘里界

連三省地按嵩縣伊陽魯山南召鎮平內鄉浙川盧氏永
寧九縣犬牙相錯峯嵐環抱此山之寬長大概也自嵩縣
西行入山山行南至黑峪溝孫家店等處遂東入伊陽界
又東南山行至魯山界又東南入南召界接南陽遂出
山由鎮平而西斜穿至內鄉復深入山中至浙川西北行
歷三關抵盧氏至永寧而止凡所過之地隨筆登記蓋各
縣之山脉絡相連而山勢險惡嵩縣爲最勘得孫家店一
區在層巒疊嶂之中川長數十里寬二三里不等水田平
地百餘頃兩山大木林立砍木拾木耳者衆多居民散處
百餘家北距嵩縣二百餘里南至內鄉二百餘里老君伏

牛二大山橫隔於前伏牛山之陽老君山之陰六月尚有積雪正南無路可通西至盧氏二百餘里正東去魯山三百里由深溝通各縣之路甚多最爲扼要之衝私鹽奸匪出沒必由之境宜設大員以資彈壓至嵩之大章一鎮人煙稠密山路可通宜陽永寧黑峪一村由藥川而抵盧氏距孫家店俱七八十里各宜添汛以相接應過鳳樓離孫家店四五十里爲嵩伊魯三縣交界之區此四處皆在嵩者也至伊陽之十八盤乃伊陽入山之要路魯山之分水嶺入廻龍溝係南召伊陽嵩縣之三岔要口魯山之歇馬嶺乃由魯山赴南召嵩縣行人必由之岔路明季曾設巡

司今宜添設汛兵南召之出廻龍溝口地名曰土地廟爲南陽南召魯山嵩縣四處出入之要衝亦宜設汛防守其在盧氏添汛者二一曰朱陽關乃西入陝西南南之門戶雖有朱陽巡檢一員實居縣東之藥川鎮亦係要路但離朱陽關一百七八十里一曰三川店在朱陽藥川之中二處設汛則聲氣可通至華陽關入豫之路有二條兵駐關口二路俱可並查後汛兵移至西坪以圖人多聚居雖相去止五六里許然止能查路一條似應復駐關口魯山趙家村新設之巡檢尙未建署今暫居寬布口村中俱非四通之衝或移之下湯或於下湯添汛庶爲妥協就山之全

形論之西南通湖廣者曰荆子關係浙川地正西通陝西者曰華陽關亦係浙川地現有汛兵西北通陝西者曰朱陽關係盧氏縣地今設汛兵則三關並列相去俱一百二十里孫家店之南老君伏牛二山重隔於前以分南北高峯插天實為諸山之祖山南之巡檢在西曰硤口司屬內鄉在東曰李青店屬南召山北之巡司在西曰朱陽司屬盧氏在東曰趙家村屬魯山今若於孫家店添設大員與浙川之同知分統各屬於南北使其每月會哨西會哨於內盧連界之處東會哨於南魯接壤之區二大員復每季一巡一會操演民壯練習弓兵以表率之汛兵之會亦倣

諸此夫三關立則外匪無由而入稽察勤則內匪不致久藏大小相維文武協力其於稽防奸究之法實有裨益再查各山之荒地易墾者俱已開墾成熟間有未墾皆山坡瘠上樹多石大墾之似屬無益山中除河扒大石之外樹木陰翳肥草甚少且猪羊等畜懼引虎狼以故山民不收其利滿山樹不皆無樵採然離城市遠售賣無人難資生理以上情形俱係卑職等親歷其境謹會同據實詳覆

陳明申

夔行紀程
自定遠白廟塘上滾龍坡入川境三十里梨樹溪為赴太平城口總路居民二三十家小場落由此入東北山溝溪

石堆磊詢諸土人云夏秋山溪水漲人不能行須度山越
嶺攀援而過行旅苦之二十餘里至出水洞山下有石洞
二處水從洞中流出兩山夾峙山溝曲折山勢陡削最爲
扼險再二十里上橫山子山坡西陀東陡環曲而下卽深
洞子再行山溝亂石中三十里至大竹河商賈聚集爲太
平通水程之所河自東而西可行船山內所產藥材茶葉
由此順流而下至陝西紫陽任河口計程三百六十里合
漢江直達臺樊襄樊花布等貨汭流至此起旱運發各處
東北三十里晏塘坪從山徑上十餘里下坡曰鷄公灘其
坡陡峻直下十五里浮沙亂石難着足下坡渡河河爲大

竹河上游上流坡十五里名梨兒壩過壩爲三灣有三太
灣三小灣之一山腰礪路寬不及尺多浮沙下臨懸巖山
灣處尤難轉折較鷄公灘之山高坡陡尤爲險峻三十餘
里至坪壩山民聚處爲場集由此上下兩山三十五里名
半壁街再陟一山下坡出溝卽小河口距城口營十里山
勢平衍山下稻田千畝城口舊名渡口場土城周二里許
南門外爲復興場北門外爲太和場民趕場貿易自入川
境山勢尖聳不似秦山平峭少陵詩萬點蜀山尖信然
由梨樹溪十五里至官渡灣沿山行路漸平坦過官渡灣
行河灘中碎石磷磷溪流瀼瀼兩山相對中寬二三丈石

壁峭立山樹懸巖而生杜鵑花紅映山谷二十里至峽河口山勢頓開中多平曠再十里抵太平廳太平舊縣治嘉慶七年改廳土城設東北二門城內外居民四五百家由太平城迤東五六里上坡名東關上建閣祀關帝下坡山漸平隨沿山墾水田引溪流澆灌紆迴二十餘里石馬河由河灘度山礪行十數里下山卽白沙河乃太平場湊集處白沙河發源八臺山過河行河灘里許由山礪上十餘里名柵欄子坡頂名王營下坡爲王溪河坡甚巘岈再二十里至瓦店子山勢一開四山圍抱坡平地濶坡下水田數頃沿山屋山水明秀竹木參差又十里至舊院壩

亦一場集再二十里過一山名雙石子下山渡龍潭河河由白芷山發源至此經井溪壩西出固軍壩入東鄉境自龍潭河過渡迤南而行山勢蜿蜒溪流潏潏行山礪河灘中樹林蓊蔚坡下茶樹叢生居民採焙而售歷十里至井溪壩山民趕場處出井溪壩度紅巖子石磴盤旋十餘里至山巔幽險不似鷄公灘而高峻紆折過之迴望白雲橫山腰縷縷如絮再五里至涼水井入東鄉境山漸坡陀綠礪下十里冷風槽乃東鄉村落二十里渡河名渡口巖亦一場市其河由明通井觀音巖直流而下至此水勢漸大可施舟楫由渡口巖緣山上山不甚高二十五里至桑樹

坪二十五里梅子關入開縣境自紅巖子而下山勢漸坦
山下皆稻田高下參差梅子關二十餘里上關口坪度山
壘逶迤而下石磴層疊十五里榨井壩人煙聚集每逢三
五八日於此趕場出榨井壩涉河灘上坡越兩山至譚家
壩山逾寬坡逾平麥隴稻塍依山坡而闢兼種雜糧菸葉
土脉肥沃再十五里過土龍洞豁然開朗十里名馬家河
爲溫湯井鹽出總路舖戶百餘家儼然成市自土門洞東
行一路皆稻田山場平衍沿河竹林葱蔚氣候暄和時未
立夏已割麥插秧至譚家壩通水道其河自雪泡山靈官
廟發源由此南下開縣馬家溝行十里度山而下卽溫湯

井爲產鹽之所東西兩山相對中隔一河河卽譚家壩下
游河東爲溫湯老井河西爲裕泉玉龍膏谷三井井鑿山
下就山坡高下葺屋而居商民聚處約千家熬鹽運煤者
數千人人煙稠密市集喧填將至井所石級連層直至坡
底渡河往西又上石磴百餘級兩山下俱小街出街口仍
渡河至東岸沿江而行山邊俱產煤之處名煤壠山腰開
煤洞煤槽取煤用四輪小車推載坡下以小舟裝運竈所
山坡村店數處爲運煤者歇足之所二十里長店房係開
縣近城大場市長店房四十里抵開縣城四山開曠稻塍
盈疇用筒車引河水灌溉山坡高下俱闢水田地盡沃壤

熙熙皞皞較山中荒陋迥異開縣城不甚大人物繁甚
開縣開河不能行大船船名橈拐子身長不寬篋篷甚矮
頭尾俱木稍如大刀形不用舵船頭長木橈或四或六推
搖出開縣南門卽登船河流湍激節節皆灘水底石少故
不險行三十里渠口場有山溪一道自北而下至此合流
據云亦通小船再行三十里入雲陽界六十里高陽場巖
高三四丈居民六七十家爲開縣赴雲陽萬縣水陸通衢
再三十里下臭水洞鍋底坑黃石版等灘灘甚險亂石森
立江水噴通石罅中舟如激箭每至此人登岸貨起剝又
三十里小江口開河與岷江合流處由開縣放舟而行江

山平遠兩岸有竹有木村落二十餘處田隴連阡小江口
入岷江六十里雲陽縣城江流浩渺滾滾而來雲陽下東
洋廟磯兩大灘爲川江中之險者白浪千層濤聲怒吼水
大則東洋險水枯則廟磯險是以有句東洋無廟磯之諺
江中溜急迴流名西迴水溶溶漾漾波紋疊起又有名殿
澗者水急上湧翻瀾成漩搖蓬震楫如顛如簸舟子必合
力推搖以濟也 由雲陽水程一百八十里至夔府城建
山坡江干上里許始達城闌城內衙署民居逐層而高俯
瞰江濤夔府之東江邊爲魚復浦卽八陣圖遺跡有石八
堆水漲沙壅石陷沙內東下五六里山坡上一白塔爲白

帝城舊址再下爲夔門山勢頓收天然一門戶進夔門卽瞿塘峽放翁入蜀記所云兩壁對聳上入霄漢其平如削仰視天如疋練灩澦堆有大石豎江心以石驗水漲落水落石出水五六丈圍二十餘丈則波平易涉水漸漲石露漸小至石離水數尺則水盛勢猛舟人停楫不前有灩澦大如馬瞿塘不敢下之語過灩澦堆爲風箱峽山頂巖壁有石數十塊狀若風箱又有孟良梯石壁上有梯級痕再數里名黑石峽流水甚急尤爲險灘過此爲下關城山稍開一食頃進峽三十里矣再三十里名大溪入巫山境又六十里抵巫山縣自入峽至巫山沿江兩岸重巒疊嶂霧

髻煙螺鬼斧神工不可思擬巫山江北文峯觀山峯碧峭對峙文峯之南爲巫山頂平下寬如巫字形由此入巫峽川江之船其名不一不能備載就見者記之板跨子內裝門窻安棹椅上蓋頂板爲官船次麻陽船亦有門窻此外廠船最大螳螂頭柏木船亦船之大者身長船深可裝重載其次有吊鉤子爬網子板頭船等名俱筏篷船頭至中船兩傍安長木橈十餘把至六七十把不等船大載重橈不勝水則用大楫以五六人推搖最小者有五板船無篷卽划子其廠船螳螂頭柏木船均帶五板船爲接續上下度人之用板頭船其梢上卷而歪下水只推橈楫船頭用

大木稍與舵相應上水則豎桅張帆大船用絳五六十人
小亦二三十人船頭仍用橈楫上拉下推逆流而上遇灘
則合三四船之絳夫百餘人共拉一船上灘再拉一船名
爲併絳道忽上山巔忽落巖脚石壁橫鐵索便扒換或
鑿小石孔僅能容趾人如猿猴蹙蹙負絳而行間有無絳
道處則全賴橈楫船行江中絳牽上頂聲息不能相聞船
上設鑼鼓以鑼鼓聲爲行止進退絳繩或掛樹稍絆石上
則鑼聲驟發絳夫停足只有管絳者名檢挽無論巖之陡
峭樹之叢雜撲身脫解傾跌所不計絳繩掛住船卽轉折
不定危在呼吸若絳斷更不待言江河之險川流爲最川

江之險又莫過於峽中由巫山入三峽經十二峯前峯峯
疊翠巖壑爭奇出峽卽湖北巴東界直下宜昌自巫山
登陸由江干進城出北門層層皆山一坡方平又上一坡
二十里至水塘坪沿途山溝兩傍坡下俱闢水田田隨山
勢之高下如梯級過水塘坪則山高地瘠僅種雜糧再上
十里達山巔名鳳凰坡將下坡底有山嘴突出上建一廟
名鳳凰觀再下坡行山溝數里至龍霧壩爲山內場集自
水塘坪至龍霧壩山坡高陡大石嵯岈過龍霧壩仍行山
中或上或下六十里山勢起伏路徑深幽下山渡河至大
昌營大昌本縣治裁汰後駐守備今又改千總汛臨河干

爲大寧場來往水程亦一扼要地建有土城兵民六百餘
戶城西北地勢寬濶水田數十頃出城行田疇中數里歷
山礪沿二十五里至水口爲大昌查鹽之所又十里孝子
溪交大寧界由孝子溪下山三十里露風堙山甚高峻下
坡三十五里渡河抵大寧縣其河卽由鹽廠而下爲水引
運鹽之路 大寧城臨河河卽西溪東溪於兩河口合流
而下出城登舟船小篷低僅容數人逆流而上峽中兩山
對峙一水中分石壁陡懸灘流湍急有黃連樹獅子巖佛
爺巖剪刀背等地名形勢類三峽三十里至溪口由小溪
上五里卽大寧鹽廠設有鹽大使分駐其鹽水出小溪之

北岸志載唐時有獵人逐白鹿於山下至此而沒就石孔
掬水飲味甚鹹因而熬水爲鹽現在石鑄白鹿鹹泉並塑
獵人及白鹿像於山次山坡上石孔中石上鑿龍頭下開
石池水出龍口噴出跳珠濺玉流石池中池下安鐵管六
十有八水從鐵管分流接以竹筒緣山度澗引水至竈以
熬自溪口至竈所沿河兩山坡俱民居鋪戶接連六七里
不斷溪口之東由大寧河上泝十里譚家墩乃鹽廠營守
備駐劄處人煙稠密山內柴廠自譚家墩至溪口一帶河
邊柴塊層積如山用以熬鹽又濟之以煤煤亦出附近山
內俱用船裝載由譚家墩越山礪名舌條山均通水路二

十里至兩河再十里烏龜峽則水程至此而止自此登陸
步步皆山地近老林樹木叢雜山坡土少石多山壤磽确
五十里徐家壩地稍平有稻田麥隴居民聚集趕場貿易
上坡則山愈高路愈險三十里苦草壩設塘汎於山上山
濟平處山民三五聚居由此登三十里官洞溝行山溝中
上鷄心嶺高插雲表翠律崔嵬爲川陝楚三省分疆洵天
設之險嶺南隸川北隸陝東連楚地度嶺經母豬洞下嶺
處石礪峭窄僅容一足下臨十丈深溝水聲潺潺行人股
慄嶺底爲老鼠檻係入陝村落自定遠之白廟塘上滾龍
坡入川境經城口太平開雲夔巫大寧度鷄心嶺抵陝境

計程幾三千里經過山川形勢聊記一二迫亦掛一漏萬
云爾

老林說

巖如煜

林無所謂老也古木幽篁叢生懸巖峭壁林旁地氣高寒
苦蕎洋芋亦不生長窮民用力開伐不能得種植之利則
木得以地之無用長其天年柴厥木厥開設萬山之中飛
車填壘工本不貲然必瀾谷尙有出路乘山水大發始可
運放如疊嶂重岡四面無可通之路則雖有美材亦聽其
老於空谷滇黔兩粵隴蜀之邊何處無老林而楚之鄖竹
蜀之江北秦之西鳳漢興特爲著名者則以地近中原有

三省邊防備覽
此鬱鬱蒼蒼叢密幽邃足以藏垢納污伏莽之奸依爲巢窟追捕費手故老林在內地竟似邊荒也三省老林就其最深廣者而言楚則二竹興房巴歸環繞數百里也蜀則太平東鄉開雲大寧環繞數百里也秦則寶郿整屋寧陝孝義洋縣環繞數百里蜀秦連界則巴山界嶺綿長數百里也林之患初無輕重而人心有緩急者則因地之遠近而分秦省出會城五十里入子午峪林近者在一二百里之中西鳳漢興州縣環列南山左右者二三十處官民心目中皆有老林故防範最切蜀之通南距會城七八百里太平大寧則在千數百里外然通南密邇棧道雲嶂往來

談及老林尙恍然於心至房竹之在楚距會城二千里地勢偏在一隅非獨官鮮親蒞卽談之者亦少矣然往時所載荆襄流民其爲楚北患者往往以興房二竹爲負隅之區卽教匪擾亂亦以襄鄧平原不能藏匿而竄伏於房竹招其黨與養成氣勢因以蔓延於夔巴毒流於南山至數年而不解則楚之老林其患固不後於秦蜀也慮遺於在遠而患生於所忽老林之在三省其明徵矣鑑前愆後通三省而籌之爲曲突徙薪之計建久安長治之謀則謂爲三省其圖其安也可謂爲本境各固其圉也亦可

會勘三省邊境擬添文武官員事宜稟

查南山起陝西西安府繞漢中興安而至鄖陽巴山起漢中府繞保寧夔州興安而至房竹興歸兩山綿亘之處均山大谷深我

國家

昇治生齒繁盛亘古未有地不愛寶廣

皇仁子惠元元兩山實養活億萬生靈而地大物豐則萌蘖易

生撫綏之中防維尤不可踈職道遵同卑府等逐一查勘

查陝西西安府之盩厔縣西南至洋縣六百里駱澗二谷

當南山深處老林已開者十之六七未開者如黃柏園都

督河敖山太古坪各等處西接郿寶東連寧陝老林廣二
二百里長二三百里不等林內開設木廂冬春匠作昔運
傭力之人不下數萬偶值歲歉停工則營生無資此帶名
三輔脊膂實關緊要嘉慶七年於洋縣西北一百六十里
之華陽設縣丞一員似不足以資防範又漢中有黑河二
道原出鳳縣紫柏山繞畧陽沔縣而入漢四面高山老林
西北棧壩接連甘肅之兩當徽縣未開老林周圍數十里
百餘里不等鐵廠木廂亦復不少嘉慶十九年岐郿案內
於鳳縣之鐵爐川設守備營尙未設有文員又興安府之
安康縣東西相距三百里南北相距六百數十里入保田

戶口甲於兩府從前清查叛產至五百數十分之多良由地太遼濶地方官耳目難以周遍該縣迤南磚坪營所管於四川太平廳城口營連界中間大山界嶺楊四巖南天門兩扇門各等處未開老林跨越兩省寬數十里袤長三四百里極爲幽險磚坪現入保甲土客一萬九千餘戶十一萬數千餘口舊設縣丞一員不足以資撫治又興安府之平利縣東西相距二百餘里南北相距六百餘里東連鄖竹西隣太平大寧該縣夾在川楚之中最爲要隘正南之鎮坪距縣治三百六十里內化龍山八仙河等處均有未開老林現設巡檢一員不足以資撫治職道等再查勘

巴山之在川北者廣元路當衝衢巴州地極遼濶二十四年蔣制憲於廣元巴州移安遊擊營通巴營守備改專轄通江軍府新開足資彈壓惟南江縣東北邊境自大巴山接連木竹埡至廣元之城牆巖老林計長二百七十八里北連陝省南鄭襄城距漢中鎮二百里軍威所及雖足攝伏奸萌而本縣只城守把總一員似不足以資防範巴州州判分防之鎮龍關至州城三百餘里而東境之官壩鍋團園秋波梁各等處距州治六七百里中間橫隔通江所管之絲羅壩黃中堡數十村庄名曰一邑實則隔境民間完納詞訟均多不便川之太平廳界連本省陝省共計十

一廳州縣隣治相距如安康平利大寧均在千里以外東
北與陝西接之大小界嶺南天門兩扇門各險隘均在該
廳境內而由界嶺南拖一支結爲雪泡山內百里荒大小
團城添子城等處係該廳與大寧開縣交界幽險異常七
年大功告竣

經畧參贊往來搜捕至十年方能蕪事該廳之城口營距
廳城三百八十里扼各大山之要該營所管周圍一千七
八百里設有經歷一員不足以資撫治夔州之巫山當巴
東興山之衝大寧扼二竹平利之要而巫山東北一百二
十里之大昌汛爲古時縣治地頗平坦民客數百戶汛後

陰條嶺烏雲頂黃草坪各等處爲房竹歸興西趨開雲間
道舊設遊擊營改設守備營現只存千總一員民客有兵
防單薄之虞職道等又查湖北鄖陽府所轄六縣在漢江
北者鄖西與陝省洵陽白河鎮安山陽商南毗連頗爲遼
闊而縣西一百四十里之上津堡駐有鄖陽府通判足資
防範惟府西南之房縣竹山竹谿三縣西南邊境距宜昌
之興山巴東川省之大寧巫山均在六百里外中間高山
廣谷爲往時荆襄流民麋聚之所嘉慶元年房竹奸民習
教滋事經大兵戡定近年以來老林開墾客民漸成土著
但各縣邊界距治太遠地方官實爲鞭長莫及三縣輿圖

南北寫長所管均縱長而橫窄不能逐處添官必須於適中之地設立丞倅方足以資撫治而竹谿之豐溪與陝西平利四川大寧連界房縣之搏磨坪與興山巴東保康三縣連界地僻人雜稽防亦關緊要此職道等會勘三省邊境現在情形也職道等伏思林開則地廣地廣則人繁往時郭外郎山地不踰百里者今則幅員千里往時戶口僅數千者今則煙火數萬家各廳縣邊境距治所六七百里山深路險命盜重案報官往返動輒兼旬半月犯慮遠颺屍虞腐變伏莽遊匪尤恐防察難周致滋事端自應添設文員而邊境民多僑寓風尚獷悍地方官尤須官階稍崇

重其事權方足以資控馭查乾隆年間陝撫憲畢沅

奏於長安縣山內分設寧陝廳咸寧縣山內分設孝義廳漢

陰縣改為通判廳治嘉慶七年經畧額侯

奏分西鄉縣西南二十四鄉之地添設定遠廳設廳之初俱極荒涼今則人戶稠密皆成邊徼重地安康之磚坪縣丞於該縣二十五舖分管五舖都司所管有近營一百二十里之孟石嶺汛係平利地方五舖地隣川邊甚為寫遠撥入平利之孟石嶺周圍一千餘里可以安設廳治太平廳之城口經歷所管大小四十八場周圍一千七八百里可以安設廳治似應於磚坪城口各添撫民同知學官管獄

照磨一員城口經歷移安高觀寺場鄖陽之房竹三縣南境無水田平壩卑府汝煒躡有竹谿之核桃園毗連向家壩地勢開厥附近居民約百餘家爲三縣南境適中之地分剖房縣搏磨坪以西竹谿縣豐溪以東竹山縣洪坪以南周圍一千六百餘里可以添建廳治設撫民同知學官管獄照磨各一員搏磨坪豐溪各設巡檢一員與房縣舊有九道梁巡檢均歸同知管轄可與磚坪城口聲勢聯絡平利夾在川楚之中爲三省鎖鑰隸有白土營遊擊鎮坪營都司似應改縣爲州改巡檢爲州判庶體制相符而兵民益見威重川陝楚邊界三廳成鼎足之形一州爲輔車

之勢聲援旣壯而防維更周太平割去城口該廳所管大小場分五十四處周圍一千三百里幅幘尙廣惟西境稍狹如將巴州之鍋團園官壩通江之絲羅壩黃中堡以東撥歸太平則通巴去窩隔之累而太平就近撫治西境亦不單薄太平爲川東門戶應仍爲縣治至蓋厘山內情形與寧陝孝義無異較之洋縣更重洋縣已設縣丞蓋厘似宜擇要添設大員黑河窩長鐵爐川營偏在西北查畧陽之觀音寺距該縣治二百里在黑河中間與棧壩相近畧沔大道中設有向家巖把總汛畧陽之北白水江設有外委汛兵房被水冲塌尙未修復如將白水江外委撥安何

家巖何家巖把總並將磚坪縣丞移安觀音寺則黑河南
北氣息皆通南江縣老林綿長應添設守備營舊有把總
應帶原設額兵安設附近老林之麻柳灣則與通江之毛
峪關南鄭之青石關聲勢相通大昌汛應仍復守備舊有
千總移安高觀寺則大昌之軍勢既壯而太平大寧亦相
聯絡南江大昌均毋庸添設交員又查三省邊境於本省
有邊腹之分實則均皆內地未可各固其圉置彼境於不
問舊有會哨章程每年十月初一日漢中鎮與川東鎮川
北鎮總兵四川提督輪年於定遠太平交界地方會哨一
次陝安鎮總兵與鄖陽鎮總兵於平利竹谿地方會哨一

次川東鎮總兵與宜昌鎮總兵於巫山巴東交界地方會
哨一次提鎮親行報院咨部最爲鄭重游匪土棍聞
風解散交員各道似宜添春巡一次每年二月十五日陝
安川北兩道於太平定遠交界會哨三月初十日陝安川
東鄖襄三道於平利之鎮坪會哨各道於所管州縣營汛
既可遍歷巡查而彼此會晤則隣境情形亦可周知至所
管漢中興安保寧夔州鄖陽各州縣地方尋常事件固毋
庸彼此關白如遇匪徒滋事及追捕要緊匪犯申報本省
督撫司道亦卽知會隣境鎮道飭屬無分畛域協力堵拏
倘事體重大鎮道卽宜親行不得推以各保各境庶平時

情形皆熟有事而聲息相通至山內墾荒之戶爲地耕種所種之地三兩年後墾荒成熟即可易流寓爲土著偶被雨水沖刷不能再耕輒搬去另尋山地地戶有荒地一段招佃常數十家鐵廠板廠紙廠耳菌廠皆厚賞商人出本交給廠頭僱募匠作廠民自食其力實皆良民而佃戶散布巖谷備作去來棚廠兵役不時稽查難免需索滋事陝西現辦保甲之法卽於招主廠頭酌其人數之多寡分爲牌頭甲長責以各自稽查歸就近之鄉約保正管理立法嚴而不擾似可通行毋庸另議章程但治法必得治人山中事宜與平原迥別必得勤能熟悉之員撫馭方能得宜

非初登仕版者所可勝任而山內水土惡劣地方寒苦官以進山爲畏途三省現設同知各官並四川之太平縣大寧巫山通江南江湖北之竹山竹谿巴東似應倣照陝西寧陝定遠鎮安鳳縣以邊缺題補五年無過以邊俸陞用庶缺分雖苦有陞轉以答其賢勞自奮勉而勤於撫馭至添設州判縣丞距州縣治所太遠似應倣照巴州鎮龍關州判之例額設刑件於所管地方命案相驗牒交印官訊詳於屍傷可免腐變而案情亦昭慎重所有查勘三省邊境情形謹繪圖貼說酌擬添設文員撫控棚民事宜緣由合肅具稟

平定教匪總論

嚴如煜

賊匪滋事之始赤子弄兵潢池耳得賢良司牧膽畧過人者撫而輯之若龔遂之治渤海張綱之定廣陵虞詡之平朝歌可無大煩師徒也迄事變旣成黨與已衆巢穴浸多多用師固艱於轉輸少用師則莫制鴟張則亂之初生一循吏撫之而有餘亂之旣成數名將制之而不足詎不信哉煜譎陋書生罔知經邦大畧顧自束髮授書耻爲無用之學則愚者干慮容有一得承執事之俯諮因敢畧陳梗概煜聞良醫之治病也先之望聞問切審其病源察其病勢防其餘病之傳症視洞重垣旣已錙銖不差然後主方

或因舊法而變通之或因已意而斟酌之妙選地道良藥炮製如法劑甫投而病勢霍然矣賢將帥之戡亂也猶良醫然則賊匪之亂源與現在賊勢暨事後必防之餘禍自當一一臚陳用備執事芻蕘之採白蓮教者漢末張魯之遺也魯父子居漢中以妖術惑衆其長曰祭酒從之者人出米五斗時稱米賊自漢以來歷代皆有其患近聞教中亦有祖師名色從教者先送供給米若干入教之後教中所獲貨物悉以均分而小小邪術足以眩人故愚者多爲所惑然其教以奉釋念經持齋戒殺爲名則所聚之徒多脆弱不堪戰鬪川省之咽喉匪其源不同川中膏沃易以存

活各省無業之民麋聚其閒好要結朋黨其頭目必材技過人衆乃共推之凡數十人結大夥先約遇難不許散幫遇追捕急公議散去始敢各自逃生如未議而一二人先散者衆共追戮之其黨極爲堅固旣結夥之後擇長林深谷人跡不到之處操習拳棒刀銃各藝故其藝頗精往時懾伏國威不過伏匿邊邑僻路攫取過客財貨自達州倡亂各匪潛相附從近聞教匪亦逸至蜀中則匪中添生力徒卒而總以教匪名矣教匪愚而詐咽匪悍而狂教恃譎張之小術啞只劫掠之小勇原其初意俱不過爲錢財貨物起見非有若盧循黃巢梟雄之資覬覦非常者出乎其

間此致亂之源可博採而知者也教匪私相傳授人衆處恒懼發覺通都大邑間亦有之者則係流寓彼間之人私學其教而歸終無敢公然演習查漢鄖一帶復岡疊障山地尚多未墾窮民往往流徙其閒開筭耕種此輩輕棄其鄉本非善良而又有奸徒潛煽之勾引者非一日之故故信從者亦實繁有徒竊嘗綜其全勢而論教匪滋蔓各處辟之惡獸蜀之巴達夔巫南阻岷江巫山之險北憑羊圈竹溪望星接連秦之青石柏楊毛壩各關懸巖峭壁鳥道羊腸古稱蜀道難此數郡爲尤甚賊匪夙匿其閒爲精銳團聚之所獸之頭也楚之郢歸施宜西北界秦東南界蜀

施南向係土官世業雍正間始改土歸流鄖陽爲楚豫秦三省之樞紐長山大谷綿亘千里明劉千斤李鬍子屢據爲亂至原傑割竹山而置竹谿割鄖陽而置鄖西析秦之商州而置商南山陽析豫之唐縣南陽汝州而置桐柏南召伊陽地當要害後乃專設鄖撫鎮壓之其施鄖之間則歸州宜昌有巴渝之餘風鄖襄之中則武當荆山據山岳之重阻襄陽南來則通安陸宜昌東過則逼荆門地廣而徑多處處可以糜爛獸之腹也秦之漢中西通畧陽北連大散興安一府多爲鄖陽分地中有石鏗金竹化龍各山暨坪埠峪觀音溝七里關白土關各要隘皆怪石嵯岈谷

深山阻號稱天險而米賊之教實始於此其地大小龍溪凡張氏遺跡土人猶艷稱之則獸之脊背也豫之浙川旁有荆子閔陵巒遙接武關由是而南下鄧州則熊耳山旗桿嶺山勢亦復巍峻再南過唐縣之銅山至桐柏縣信陽州則桐柏山大復山窟窿山與武勝各扼古稱義陽三關者實雄峙其間固不必似楚蜀各邊之嶮巖而中原之地此帶實爲奧區則獸之尾也通計由巴達至信陽西南表遶東北達之東南路近三千里南北縱廣亦不下千餘里楚攻急則潰入秦豫秦攻急則潰入蜀豫蜀攻急則潰入秦楚豫攻急則潰入楚秦將據險守要而地大路繁隨處

可以偷越將稽察奸細則俱係百姓分辨甚難徒爲行旅之害昔楊武陵計驅羣賊入川委蜀爲壑四面聚而殲旃及蜀不支賊勢盛而楚隨以傾孫雁門拒流賊於關外賊覆全豫豫覆而旋即秦關秦亦不支皆失策也論者謂賊匿四省邊隅深山密箐之中攻勦難進搜捕不及致一時難於撲滅不知賊在深山密箐固難於攻擊亦易於坐困設長策以守之用奇兵以襲之終爲罝中之兔網底之魚而縱之入平原曠野無論有舊從教匪者爲之內應而承平日久民不知兵風聲鶴唳望塵驚潰地方無賴之徒乘機因以虜掠其害不可勝言矣此賊勢之不可不知也至

經賊匪殘破各地方雖大兵恢復而當時權行招納則中懷反側者當自不少所有流亡之衆轉徙歸里零星四住未能氣完勢重沿邊各邑大者跨山連嶺幅幘數百里其號稱彈丸黑子者亦不下數十百里州縣設兵額數名數十名形勢單弱詎能徧爲巡邏而北省召募鄉勇半爲收羅地方無賴起見尤難資其實用則新復各州縣城郭固自依然將何恃而不恐耶賊匪雖無遠畧亦有小小詐智心計取道未破州縣必遭攔截而從旣殘各地經由可以通行無阻至旣殘各地重被匪害則附近未破之州縣必大爲驚擾探其人民逃散村落空虛者便乘間焚劫是賊

借山谷爲巢穴被害各地爲旅舍而因以蠶食各郡邑也
新復各州縣往往重被擾害實由於茲竊計新復各州縣
必實有以固其圉絕賊匪重擾之跡者而後可逼賊入巢
用鵬勦以清餘孽他如被害各村落廬舍蕩然難民無資
以生撫綏稍不得宜其不能自存者或更潛相附託亦情
事所容有此亦如醫者之宜兼防乎餘症也煜未親至行
間並未見茲事以來各文報則局外議論詎能得其要領
而鄙見所窺有如此者至於攻勦之方安輯之術或四省
而求一舉盪平之策或於全楚而爲保疆自固之謀尙當
力竭思慮分路籌畫備大智邇言之察焉

南山詩次韓文公韻

唐仲冕

風詩詠紀堂傳記稱苑囿拔地光上騰興雲澤下究中條
位最尊太乙神所授度懸逾惇物丹砂類勾漏節彼具爾
瞻佳哉予云觀九州第一險羣峯斯大湊井絡照垂珠隰
衍紛錯繡脈從氏道行徑向洛源透縣亘千里強孕育萬
彙茂將以表四塞先爲數列岫華嶽視三公桓圭纁九就
特擘巨靈掌迺奏歸昌囑驪嶺鬱蟠紆黃山蔚深秀高凌
沈瀼莖節應海窟耐六爻度乾剛尺五近天覆龍門絕壁
開牛首靈臺構膚分金粟肥骨萃石樓瘦脊脊貫藍田襟
背通碧宙七盤十二紆九嶮三千鏤自華紀廣輪於岐考

延袤太白金星明穹蒼秋氣候周原列見孫吳嶽猶倅造
守閔嚴子午升阜擇庚戌荆岬積雪陳阪咎咽水竇翰音
聞膈膊鷺鳥養味漱嶧豕流濫觴武都壤雜糅梁雍多合
沓褒斜眇晴晝岔路牧亡羊毗界麻爭漚大巴蹲熊羆中
梁逐狨狄雲門迴欲開天柱屹不仆紫柏殊崢嶸青蓮頗
僻陋鄠注別支長胡書良材富齋壑交隱麟川瀆互奔走
鎬洛基文王仁政溥在宥灞澹湖穆公霸術獲倍售涇漑
入鼎州豐注指乾祐晉有涇陽思楚爲商於詬弦蒲藪無
虞炭谷湫修發白渠鄭國駮藍橋尾生慈郿鳴憶漿封皇
澗存邠舊西自鳥鼠同東過漆沮又漢與星河通江共蚪

蛇畧嘉陵僅通舟大散利禦寇沔沈仙閣飛谷墜雲棧救
下便窺鯢桓上直探雀鷲疆皆南山聯續在西陲秦長工
爭墾關商賈更遷貿盤匡曲並通鄆杜行相近七二峪羊
腸廿四嶠鷄脰黃墩極蕭森元扈疑問瞽土豹傍碣藏木
馬沿溝溜龍興姬京獨虎視羸都復鄜時折而左陳倉趨
以右亞父迎式車子儀立免冒嶠函控咽吭巴蜀通聲臭
興元形勝雄定遠名實副池荷敷篔簹榆林特狸鼯魚肚
桑柘密雞心橙橘皺茅堙防莽伏麻溝戒鼠聞犬牙杜鷓
張蛟卵伐雉雒河由鐵冶荒谷到車箱輳五朶雲方攢八
度馬齊驟漢江詔防維楚塞資佐須效稂莠除先儲艾

葉灸丙穴摩峭碧甲河涉沙穉郎襄荆閔扼夔峽岷津迢
流移善推遷土著安未耨賦則木稅輕佃客遞價購游手
室惟棚強舌語半譎轉徙辨川廣扶攜偕老幼積久連親
隣反眼輒刺謬膠株摧燒畚玉米春堆餽禮驩豕執牢師
動牛鳴柩叢占千畝竹箕落一頃豆紙簾及樹鷄鑪鍾饒
炭獸同袍呼駟鐵異端托靈鷲執言禽失前敗羣羊鞭後
隴低躍野賓橋柱畫村畱教養誠勸懲仇讎變姻媾往遭
探黑丸非種舞紅袖到處苦蔓延隨時痛獮狩成城戢衆
心開網許自首墜谿疾裏糧泥甑容搭餽堅壁鎖巖疆清
野囂井收勁旅已三駟

威弧莫再穀賣酒鑪無燹煎茶坪有標正當閭首俗何憂
境尾繇民順地水師

后施天風妬疇昔柏梁篇聯陳寇菑遊由來桃林塞遠接
參墟宿豐牛梓入池宛馬龍歸旣采芝得蟬蛻種玉盈瓊
琇上腴鋪穀穎神囂簇簷雷隗延進難憑曹真敗亦狃亂
倡李特劇勳推溫造懋聚米觀掌紋奏刀中縈膝茲山關
治忽計功承享侑豈綠涪翁評而爲退之疾我慚樂只歌
深恐厥口咒緬懷石室居幸免漆船儼旱蕩方技餐霜柑
仙客嗅書事擬北征千載相齟齬

煎茶坪

吳榮光

古磴百萬級繚繞煎茶坪欲上仍盤桓身世何屏營雙組
 百夫曳一落千丈輕寒漸與雜還亂石相支撐喘息陟其
 巔尺地如掌平土屋八九家暝烟起爐鎗行道亦載渴及
 此新茶烹估客爾何來千里攀峻崢錚刀誠幾何失足命
 已傾樵子爾何來雲裏紛紛丁日暮胡不歸虎豹伺猙獰
 戍夫爾何來荷戈此長征秦關與漢月忍矣劬勞生此地
 扼奈吭昔人幾戰爭南望和尚原西望氏王城陰風燃野
 燐白日窺山精至今閱千年但聞猿欲鳴一水東西流渭
 漢分縱橫東行十餘里瀑布來琴箏去去觀自在度入禪
 梵聲東為觀音堂多瀑布

巴山吟

嚴如煜

巴江曲成字巴山高極天連蜷八百里半蜀半秦邊奇峯
 望突兀複嶂走迴遶千章森古木鬱鬱屯蒼煙參井逼象
 緯四月雪花鮮其支走巴達魚鳧舊井屢雪泡梭羅嶺圍
 城一碗泉羣峯兒孫列鉅者隨以肩蒙茸虎狼穴陰翳鶴
 鷗翩晒旗與拴馬間道父老傳西寇昔竄突鴉賊亦狂癩
 往來皆取徑漁肚妖祲纏撻伐勤褒鄂懸巖樹戎旃蟻封
 困驥足爬搏屢年年趨趨額威勇區畫壯猷宣班城分符
 竹百雉金湯堅瓦石拊脊背高柵樹層巔威聲壯絕徼村
 落高枕眠花明紅羊峽雲淨星子前此山太阻奧十戶九

三省邊防傳覽
流遷工作紙耳厥襁負多楚黔攘剔誦周雅輔車稟古賢
戶扉旣巖鍵藩籬應密編秦中星碁布雄鎮金梁聯三巴
扼蜀吭閩夔路幾千林大地空濶山深路幽偏守望仗鄰
好瀆川虞滴涓王公慎設險君子防未然

棚民嘆

嚴如煜

終南古陸海千里望蒼茫板屋幾土著結棚滿山梁扶老
攜樨弱鶉結無完裳晝炊支礁石夜宿依空桑遠從楚黔
蜀來墾老林荒葭葦認親友音口尋鄉邦先來個招佃籽
種借雜糧數椽架茅屋四壁繚茨牆衝寒砍棘樹夜燒連
叢篁雨水纔過節偃僂揮鋤忙春深挑野菜續命糝米湯

指望收成好滿篝歌穰穰誰知山地薄塗泥壤非黃年深
葉成土一年肥於肪三載五載後礲确銛刀鈍况復近歲
來低山盡村莊溝岔無餘土但剩老青岡歛厓巖崩劣枯
樹汁瘦瘍高寒積陰殺庚伏破裘涼玉黍雨三尺蕎麥一
尺強愁霖七八月山裂嫩瓜瓢土痕刮條條巖聲滾碾碾
釜甑半罄薤營購重周章蕎落黍花萎青風不生漿磊磊
紫洋芋蒸饅當餓餓籽種不能設債借幾時量辛苦開老
林荒墾仍無望故園歸未得遷地果非良鳩鶴對形狀惻
然爲心傷地勢本如此豐歉寧能長鴻雁噉中澤遷徙亦
靡常畝金有沃土山中豈樂鄉所幸宜五種食不止稻粱

三省邊防備覽
屢豐聖人世山隰殊雨暘勤儉天所福葑屋積橐囊但能
勞筋力飽粥充飢腸五方處錯雜慎勿爲菱根我聞項司
馬驅之猛虎狼又聞原都憲安之成保障驅除吾何忍又
安謀難臧才微慚民牧中夜起徬徨

木廠詠

嚴如煜

岐豐治西伯道通化斯行作屏詠周雅伐木聲丁丁終南
勢蜿蜒接連太白橫千里蔚蒼翠參天灌木縈名材挺杉
栗松柏冬青青采之利民用販運還雍秦鉅者作梁棟細
亦供爨薪商人厚賞本坐籌操奇贏當家司會計領岸度
工程書辦紀簿冊包頭夥弟兄開林百十里作料兩三春

森森連抱材縱斧牽以繩剝落旁枝葉截檝尚百鈞天車
輓坡嶺天橋渡澗阡背板力任重強健騾爲名積聚待漲
發水脚趲溪泓猴柴堆谷口嵯峨排木城一廠羣工備大
者屢千人以漸開而進約束似行營西通棧壩奧東去接
商郇工徒半流徙億萬倚以生前年生萌蘖不逞潢弄兵
扼吭仗健將元惡戮鯤鯨民利詎能禁患生端有因開采
資商本實賴得年頻糧賤生計易數錢腹彭亨商利大於
母工徒聚如蟲旱潦事難定青空糧不成一年食已貴再
歲詎支撐斗粟千青蚨商絀工亦停紛紛食力備何自安
其身况復牛山美光濯乃常情雖云老林僻壤地還可耕

詎知采運時一木百人轟蟠根地尋丈種穀能幾莖高寒

剩礱礪五種異繡畛曲突若無計上座屢舉觥安危邊亦

腹撫馭能兼循綢繆謀應預稽防慮貴精天作大王荒岨

矣路平平祥和慶盛世屢豐卽永寧當家領岸書辦包頭

中背板健夫號某驛子運木過山用天車過澗坑用

天橋皆架木為之木料積山中俟山漲大發始能放

兵徑趨厚畛子巢穴縛首逆萬五故迅速完事

鐵廠詠

史公載平準大書桑孔事上佐軍國需資賴鹽鐵利舉金

耕以刀厥功同陶埴古聖前民用貨惡人有棄南山當坤

維金精靈氣積處處與鼓鑄民命亦所寄當其開採時頗

嚴如煜

與蜀黔異紅山鑿礦石魄磊小坡歸黑山儲薪炭縱橫排

雁翅洪鑪兩三丈傑然立肩曩風箱推連宵燭天紅光熾

高匠看火色渣傾液流地鐵板堆如屋范模成農器黑溝

黃花川家具頗堅緻錐鍊工良苦鑄鎔資不易老林連坡

陀匠作采取恣奈此且且伐年來剩山翠一廠指屢千人

皆不耕食蚩蚩無業氓力作飽朝饔上天不愛寶助我太

平治豈無道逃猾雌伏屏鼻息豈無透漏奸黠禁嚴關吏

地利有時盡生計以憔悴乃知宏羊法病國非為義

紙廠詠

嚴如煜

洋州古龍亭利賴蔡侯紙二千餘年來遺法傳鄉里新篁

四五月千畝東青紫方塘甃磚石尺竿浸藥水成泥奮鐵
鎚縷縷成絲泉精液凝瓶甑急火沸鼎耳幾迴費淘漉作
意淨渣滓入槽揭小簾玉版層層起染績增彩色縱橫生
文理雖無繭綿堅尚供管城使馱負秦隴道船運鄖襄市
華陽大小巴厥屋簇蜂壘匠作食其力一厥百手指物華
天之寶取精不嫌侈温飽得所資差足安流徙况乃翦蒙
茸山徑坦步履行歌負販人叢絕伏莽子熙穰聽往來不
擾政斯美嗟哉蔬筍味甘脆殊脯肺區區文房用義不容
奸宄寄語山中牧勿以勞胥史

奉檄巡查商州西鳳山內感賦

嚴如煜

一峯未過一峯橫前漲纔低後漲生路奪蛟龍衝駭浪林
藏虎豹作風聲萬家黔首邦之本百折羊腸命已輕西顧
九重頻眷注馳驅

王道總平平

九月曉關雪滿巔履冰翻在履霜前

初十日霜降節
初五日已下雪泥深

踏石愁添雨衣濕圍爐怕撥烟過嶺雲縈三尺縉凌波襪
結十夫肩危途未敢言憔悴念到民艱更着鞭

十餘名拾小兜
肩上搶濤而過

重陽佳節恰山陽茅店菜萸未入觴黑蜨裊銷雷鼓震
鼓祈赤烏靈放日輪光晴川縱轡危仍伏峻坂關心滑不

妨須識險夷都在我登高謾詡有仙方新晴郭僕放馬而行連馱驟均踐礪

中衣袂皆濕

荆揚轉徙到三秦牌甲懸門別老新荒墾那能成沃土饑

驅敢怨作勞薪丹崖蛇徑三千里板屋鷹鋤百萬人墾荒尖鋤

號鷹尚憶二都勤撫我哀鴻中澤輯流民山中有二都祠祀原吳兩撫治

陰森無際望蒼蒼百堵高墉屹五郎開府遠猷嚴保障元

戎苦戰靖欃槍金商山鏟雲間壘子午人屯谷口糧不信

頻年警烽燧熙恬景象在豐穰老林中建寧陝廳額侯勦辦教匪大得其力

地氣高寒雨又風時暘不苦歲青空百千個紫洋芋磊林旁

五種不宜民間栽洋芋作頓三兩包黃玉米豐豐年包穀一莖結兩三包鄉黨葭芋

依地主社祠鷄黍賽村翁歲時亦有山氓樂作息堯天鼓腹同

黛色蒼皮古樹稠松杉梨柏聽搜求連雲冰溜趨行馬轉

月天車走健牛既以奇贏饒大賈須知羣力藉包頭如何

聚散憑豐歉歲歲辛勤也得酬木厥潤于澆水成水木走如馬天車多用牛推厥中

水陸運脚皆有包頭承攬

到處洪爐斲嶺青洋川造作又龍亭鐵官市弛宏羊禁玉

版家贏韋氏經民富不爭山澤利物華競獻地天靈刀泉

滾滾荒場積康阜年來變鵠形洋縣龍亭為崇倫封邑西鄉定遠皆舊洋川地今多

紙廠

甲河丹水武關東楚豫峯巒望眼中狐火香燒供米會犬

牙莽伏曳刀雄鑿山石碣鐫羅牧粒我神君酌聶公長吏

可能勤撫馭雉馴劍賣化澆風商州石路三百里羅刺史開路有石碑鎮安聶公勸

民墾荒樹藝相傳作本縣城隍

數椽茅屋憩黃昏父老殷勤酒一樽楚語吳音相問訊山

糧市斗與詳論詩思晴岫碧雲塢客路霜天紅葉村珍重

行臺宣

德意諮諏敢恤詠周爰

南山詩依退之韻和陶山先生作

嚴如煜

鄠杜環漢苑堂紀蔚秦圖黃圖壯中南巍峩莫窮究奇情

抒呂黎恢異天所授凌虛光陸離涵萬一無漏退之詩虛狀山景

公踞太乙巔俯與羣峯覲天風助吟聲烟霞來相湊雨豪

泰華角一幟赤雲繡謂余山主人重圍未許透小隊聊攀

躋春旂擷叢茂時立春日精英握巨手餘翠拾眾岫巋岌未了

青點竄入急就翳維東井疆適當朱鳥囑黑河西黥黥丹

江東娟秀渭濁黃流漲漢清絲醺耐四圍水滌洞萬疊雲

嶠覆太白肩追隨惇物神結構紫柏鬱陰森玉女挺清瘦

濛源揖嶠冢屢屨當坤宙江宇拱三巴皚皚對冰鏤絕垣

程五千三州地廣袤崧岑攢叢叢兒孫羣踞候峻還極于

天清籟弄遙筵九關排六丁七宿聳五戌星摘三須樓天

窺別有竇指按風子落口張紺露漱高厚廣發育勾甲生
雜糅鴉鷂啼寒夜蝙蝠飛白晝草蒨斑嘯風湫宵蛟作漚
卵不數燕鶯胎詎競猿狖墜荒斲構樛跨礪虬枝仆跣脚
躡霜雪鬢髯山都陋玉黍蕎菽芋彌臯種收富礦挖銅鐵
鉛不脛遠鄉走財從陸海攫辜有逋逃宥鹽布筍草堆黃
琥赤瑤售神突叩叢祠豚鷄祝庇祐皮薄屢停空安土翻
所詬誅茅棚架椽覆板瓦不甃土流人亦流踉蹌痾愚愁
編甲民多新承糧戶鮮舊生齒百萬稠豐稔難頻又良莠
紛鬱莠野心誰為畧小者娃工緒大乃成盜寇硿壑潛避
匿飢寒莫憫救走險急挺鹿安窠乖飲穀此山關治忽父

安古艱奏興勢撤諸圍伯約殊貿貿荷池過奏迎蜀道走
邂逅監軍亂興元頭祭挾胸脰招討揮如意漣涕笑雀瞿
保障無至計泰山石穿溜憑陵憤張李雲棧肆往復天網
張四五雲陣排左右窮寇車箱困待斃投介冑督師齒焚
身陳奇草木血腥臭曠野縱豺狼深樹竄鼯鼯魚爛殘半
壁推穀才難副楊嗣昌節彼民具瞻山靈為眉皺戡定資將
勇龍戰陋穴鬪星馳迅狡狴雷鳴動雉雒元老信神武經
額威智畧况輻輳陣守壁壘堅誠村鎮軍軍行風雨驟時
提軍有一日崢嶸山生色慷慨神所佑青霜劍光閃擊賊
一百八之謠非轂炎叱咤動山岳磨崖鐫史籀冥冥妖殺銷亭亭霽光

迥山容洗時雨山民安耕耨山貨山藥材市集聽求購溪
流響潺湲人雜語誼謏拄竹憩老翁襁負搬細幼高山古
公荒夷行語不謬作屏灌木拔新炊饌飮餽生者飽糗糧
沒亦安完樞因思南山治如種南山豆分行灌長畦食苗
防野獸東道通金商七盤盤健鷺曉關當其前鄒關峙於
後中屯五郎營腰竹挾勾畱南午北子谷義取陰陽嶺西
駱穿灑洋樹篁刺裾袖華陽黃柏園貞元書來狩迤西漢
樂城翻越白雲首晨馳五丈原飯蒸氣尚饒褒谷聳馬驕
鳳嶺稼雲收岐鄜出斜峪萬弩此鸞殼大散扼牛堡燒棧
縱薪標美名占天漢兆為龍準繇陳倉暗度秦白水故道

始蝻蝻區雍梁崎嶇行相遣官有列城居戍多重兵宿僻
路夫肩兜衝驛馬嘶厩崇岡徧要隘星布朗弁琇仰瞻快
措頰臨眺暢頤雷曲突還徙薪長勝未敢狃厚畛都督河
吳剛戰功懋廂匪之役吳毅菴提軍戰功最著棧壩兩當徽古木雲膚腠
匠作繁有徒分理設佐佑外絕侵軼奸內釋腹心疥嵐瘴
淨層巒陽晶通默况塵空撐突兀絕頂凌一傲賦材慚大
夫蘭函忻再嗅心傾高山奏顏酖春酒酌
南山詩次韓韻和唐陶山先生作時讀三省邊防備覽書

蔡成輅

南山惟巖巖具瞻雄九圍雲物一千里支派莫窮究太白

與華嶽融結會所授坤艮設地險竅缺窺天漏量腹充其
容累卵危莫覲有巉梯難升有川舟奚湊未午次綦布井
翼度絡繹濁渭繞北趨清漢貫中透東拒武關隘南接池
荷茂鳳翅張隴秦牛心卓巖岫應接吁不暇討求茫無就
異聞力士掌詫述巨鳥噉冥冥開洪濛一一吐深秀蕭曹
創堰壩膏澤沃醇酎劉項守阻險橋棧議傾覆易剝跡尚
存代蠹林難構石洞雙門高郁閣萬柱瘦飛虹落危岑矯
龍舞空宙鱗鱗玉壘攢翼翼青泥鏤回旋七盤峨蜿蜒一
線衰武陽控江關興勢聯烽候揚旌鶴唳清引矰鷗羽筵
木牛走夷庚流馬占吉戊疑兵隱長岡間道穴旁竇雄藩

任安固霸圖成澣湫興元勢當衝袞斜路彌綽常侍戮新
軍烈日赫夏晝特雄分劇據巨陂浮泡漚銅劍石狻猊彭
劉跳猿狖伏莽茁萌孽自古屢興仆林箐易掩藏蹊徑更
僻陋往歲惑異端經堂積錢富如蟻慕羶來如蟻舍沙走
架躡十字寬網開一面宥欸客帳房張質帖田舍售朋類
相勾連兵胥暗護祐動以盟兄稱輒爲乾兒詬插棚詔安
巢打浪擾古瓮錢客分黑紅長櫃煽恂愁牯錐穎脫新鯨
尾器非舊積久蔓益滋披猖萌乃又會當蠢苗興聲吼應
湫囂一麾勞出師八載利禦寇廓清盪塵氛匍匐勤拯救
安良善飼雛摘奸易採馘投戈胼胝劬賣劍弦歌奏捕莠

務農功闢莽通商貿遠客挾飲來羣工陳力迓篠磴斲貓
頭藤嶠剪鳧脰荒蕪轉膏腴曠濶豁眩瞽其中有良田溝
渠蓄清溜其穀宜稻黍阡陌種往復薑畦爛交錯麥隴分
左右落蘇小于囊懸瓠大如胃灼灼芙蓉舒漪漪蘭蕙臭
搗蕨儲常豐包穀利倍副便捷竄果狸出没走竹鼬梅桃
李奈芳橘柚柑橙皺香稻鸚鵡曲奇花麋鹿鬪啞啞集鵝
羣閣閣捕蛟蝓望氣金銀呈鍾準瓊瑰輳貨殖愈蕃蕪人
煙益競驟場竈接寨堵廂廠比鄰估猴柴壓擔忙獸炭封
窰炙汲綆井有丹淘牀沙盡籊隔年點花繁過雨駮茵逗
運材八角輪采藥長柄耨肩摩遞驅馳背負勞販購不

丁字棒健夫氣亦譁夏至紙槽開摘筍歡老幼道元注非
腴方朔諫不謬櫛比有棲糧春相燦陳餽鴻堵安其居燕
壘久若柩姻黨瑣綢繆鄉音轉渡豆春耕聞桑鳩夜獵僅
石獸節鎮羅星垣郡邑拱雲鷺夔綏唱在前與漢喁在後
繡圻界互衝魚渡壩束畱團練警籌防屯堡迭相構曹椽
效匡襄生儒表領袖乘屋亟宵綯滌場落冬狩擊壤共臚
歡獻曝自陳首熙熙如享牢蓬蓬若蒸餽勿恃歲屢豐狼
藉糜積收勿謂盡高飛良弓輒弛設勿耽樂晏安燎火供
薪樵勿爲幻譎張終凶辨交繇翳惟嚴夫子口碑道夔姤
令宰歷監司政聲罕逢邁經緯畢具陳如天之列宿駕馭

無不宜若馬之在厩洋洋化弦誦盈盈挺瑩琇偶值新秋
來苦歎舊時雷乃厯痾瘵憂或恐奸宄狃飛符星郵催撫
字春膏懋同聲共慰勞一言中膚勝我昨來西秦彈缺空
自脩試誦退之詩率率塵心疾欲訪子房蹤恐懼山靈呪
杳杳禹甸長膺膺周原儻保艾樂只歌采菊悠然嗅

天子壽無疆舞蹈兕觥醕

